

Leveleseni

Mani kemona agimo aepa'a Kanite kefina mage huno hane “Fala kimainea yana alino fufute maleno ali falote humalene.” huno humaine. Mani avona haenagama falote hisia yana Yisasi Kalaisi'a himona kana yapi ali falote huno Yonina ave-ligeno Yoni'a kae-malenegeta nehavune. Yoni'a ani kanafina kosuna leteno nagola ti amu'nopi hanea kumate kina nopi maineno mani ya'yaga himona kana yapi ageteno kae-malene. Yisasi'a faliteno hetino ikapinaga haitegeno Yoni'a sikisiti faefu'a (65) kafu agava maineno Leveleseni kea kae-malene.

Mani kemona aepa'amo'a ma'a humaine.

¹ Nagaya Yoni'nae Yisasi Kalaisi'a navelige'na agete'na mani kea kae'na tamahapaigahe nehue. Nayona mani kemo'a fala-kino haneanagino Anumaya Koti'a ani kanamo'a aupa'a falote hisia yana Yisasi Kalaisina agai'a ali'ya vea'ne amavelisiafene huno Yonina ave-ligeno kae-malene. Yisasi'a ensole kano'a hutegenonagaya agai ali'yama ne'alua kanoa, Yoninile, ea'amo mani ya'yaga me naveli-maine. ² Me navelige'na age-mainoa yafe'ene Anumaya Koti kene Yisasi Kalaisi humainea kene ali'na tamage hu'na tamahanepauve. ³ Ma avopima kae-maloa kea ago aupa'a falote hisia yafe aune laga huno humainea kema hapali'ya havisaya vea'nene

havite'ya akave'ma malesaya vea'nene tusi'a muse hugahae.

Yoni'a seveni'a (7) kumate hanea mono note avona kaeno amamine.

⁴ Nagaya Yoni'nae Esia kotega seveni'a (7) mono noma hanea vea'mogatamale mani avona kae'na nelamamue.

Anumaya Koti'a nayona maineanagino menienena maineanagino haenaga'a maisia kanogino agai'a kava yagai-mainea siamo aulega seveni'a (7) Avamu'mo'ya heti'ya mainayanagi'ya kayone hisaya ya'amiene tamaipa falu hisia ya'amiene tamamisae. ⁵ Tamamisageno Yisasi Kalaisi'a fatago huno Anumaya Koti kema hamapai-mainea kanomo'a fali-mainaya veapitila uhagote-lateno heti-maineanagino muki'a vea'nema fali-mainesafiti hetisaya katia valilatene. Muki'a mopafima mainaya sauve vaya'mogamina sauve'amimo'a agai'age maineanagino kayone hisia yama'aene tamaipamo falu hisia yama'aene tamamisie. Tagaifena hau ayamopafi haigeno agai'a kolama'a ailaki-talenea yateti muki'a kefo yatimo'a aigagilateneanagino agola ali kalu hetalene. ⁶ He-taleneanagino Anumaya Koti'a kava yagailatesia yapi tavaleno tategeta mainonanagita tagayama Nelafa Anumaya Koti ali'yama ne'alita agima alisaga huta musema hutesunafene huno hulatene. Hulateneanagita muki'a kanafina agai agia alisaga hisunageno

tokiya'age hale yama'amo'a agola hanege hanege huno hanesie. Tamage.

⁷ Ageho Yisasi'a siate maiteno egahigi muki'a amakave'noma hutete'ya augafafima kevema aye-mainaya vea'nene muki'a ma mopafima mainaya vea'mo'yaene agete'ya tusiya hu'ya hamau hute'ya avi tegahae. E, ani yana tamage huno falote hugahie. Tamage.

⁸ Ala Anumaya Koti'a mage huno humaine “Nagaya nagai'ni'a muki'a tokiyamona aepa'a mainoanagi'na muki'a yatela kava yagai-mainoafe alivayayesua kanoa tamage hu'na mainoe. Nayo kanafina mainoanagi'na menia mainoanagi'na haenaga'a maigahue. Tusi'a tokiya'nia hanea kava kano mainoe.” huno hu-maineanne.

Yoni'a Yisasina age-maine.

⁹ Nagaya Yoni'nae neputamimo'na tamakai'enenena Yisasi'ene ailokaeta mainona yafe tusi'a kana ya'ene tagata aiya ya'ene falote hianagi Anumaya Koti'a kava yagailategeta mailava huta tokiya'age huta mainone. Nagaya Anumaya Koti kene Yisasi'a tagai'ma hulatenea mono kene huhale'na hua yateti navale'ya Patimosia ti amu'nopi hanea kumate kina hunatage'na mainoe. ¹⁰ Mainogi nago Sota'yupa Alu Aotage Avamu'mo'a tokiya'age huno natafa hige'na nehavugeno nakavelagati nagola ala kegefamo'a ufema nehaya avamete huno agea aige'na havimainoe. ¹¹ Ani kemo'a mage huno humaine “Muki'a yama agesana yana avopi kaeteka atalegeno seveni'a (7) kumate

hanea mono note veatega vino. Efesusiene Simenaene Pegamumuene Taiyatailaene Satsiene Filatelefiene Leotisia'ene vino.” huno humane.

¹² Hige'na kema nahapaiya kanoma agesuafene hu'na maiyaha hu'na agoana seveni'a (7) lamua kanileta yafateti talo humale lamua hanege'na age-mainoe. ¹³ Agoa lamuyagamo amu'nopina nago kanoa, ikapinagati emainea kanoa vaya'mo atenea nafa'nemo augafa kana kanoa hetino mainegenoa aya'aya kenamo'a aiyalega vai-talegeno tavigeno kanileta yafateti talo humale amu'nofila aigagino haifi'yafale hu-malenege'na agoe. ¹⁴ Agogeno ayolagefamo'a efe'age huno sipi sipimo ayolagefaleti talo humale nofi kana huteno efe'age sia kana nehigeno aulagamo'a ata nefemo'ma hia avamete humane. ¹⁵ Higeno aiyamo'a nagola atafima kae-malageno teno tokiya'age huno hale yama'aene kanileta yafa kana nehigeno agema aiya agemo'a paugagefa nehigeno ala timo agemo'ma ne'aiya avamete kava huno aimaine. ¹⁶ Ayapina seveni'a (7) ka'nefi atafa hu-linegeno avayafitila tole kaiyaga ave'ne'ne naepe ka'yona anikofi-linegeno augosamo'a yagemo'ma hia kava huno aigalu galu huno aivasa humane. ¹⁷ Aigalu galu hige'na ne'age'na fali-mainea vaya kana hu'na aiyafi nago'ya aye-mainogeno tamaga ayana naugafale maleno mage huno hie “Kolia ohuo nagaya muki'a tokiyamona aepa'a mainoanagi'na

nagaya uhagote¹na maite¹na haenagalafana maite¹na hu¹na mainoa kano mainoe. ¹⁸ Nagaya nahaimu¹ene kano mainoe. Nayona ago fali-mainoanagi ago heti¹na haegafa hu¹na agola muki¹a kanafina maige maige hu¹na mainoanagi¹na vea¹ma nefalia ya¹ene fali-mainaya vea¹mo¹ya mainaya kumate ki nofitela ali-line¹na ani yapiti¹ma amavale¹na amatalesua himamu¹nia hane. ¹⁹ Haneafe kagaya menima falote higeka agana ya¹ene haenagama falote hisia ya¹enena avopi kae-malo. ²⁰ Seveni¹a (7) ka¹nefi¹ene seveni¹a (7) kanileta yafateti talo humalenaya lamuenena tamaga nayapima hanegeka agana yamo¹a falaki-mainea yamo aepa¹a kahapaigahue. Seveni¹a (7) ka¹nefi¹mo¹a ma¹a humaine seveni¹a (7) kumate¹ma Yisasife havi¹ya melitalu nehaya veate kava vayafe* humaine. Seveni¹a (7) lamumo¹a ani seveni¹a (7) mono no¹yagafi Yisasife havi¹ya melitalu nehaya veafe humaine.”

2

Efesusi mono note mainaya veatega ma kemo¹a umaine.

¹ Efesusi mono note mainaya veate kava kanohena* mage huka kao nagaya tamaga nayapina seveni¹a (7) ka¹nefi atafa huline¹na seveni¹a (7) kanileta yafateti talo humalenaya lamumo amu¹nopi ute ete nehua kanomo¹na mani kea tamahanepauve. ² Nagaya tamakai au¹ava yatamia ago age-mainoe. Tusi¹a

kasageke-voke hutama ali'yama ne'aliya yafe'ene mailava hutama tokiya'age'ma hutama nemaiya ya'enena ago age-mainoe. Kefo yama nehaya veafena “Havigege'yama nehaya yamo otahaiya vayala mainayanagita tamakai kea ohavigahune.” hutama nehae. Nehage'ya ani vaya'mo'ya havige hu'ya “Tagayaenena Aposolo vaya mainone.” hu'ya nehayanagi tamakaya ke'amia ago havitama fako hutama haviyana “Havigege'ya mai'ya nehaya vaya mainae.” hutama nehae. ³ Tamakaya nagai nagima alilinage'ya ali haviyama hulamatayanagi kasalola otamahaenegi lokiya vaitama mainaya yafena ago tamake-mainoe. ⁴ Na'a nehayanagi nago'a kavala havi kava nehae. Hagotetama nagai kea havitama lamakupi maletama tamaku'a kanale'ya hutama namitetamagi menia ani yana ago ne'ataletama ali hataga huligeno osi nehie. ⁵ Nayoma tamahau tamayamopafi tamahau-mainea yafena tamakesa havi havi hiho. Menia ago ne'ataletama asaga hulavi-mainagi tamaku'a aiyahae hutama nago'ene ehe'ma humainaya kavala etetama hiho. Tamaku'ama aiyahae ohisage'na nagaya esua'amo'na lamutamia meli'na atalegahue. ⁶ Atalegahugi tamakaya nagola kanale au'ava yana ago hage'na age-mainoe. Tamakaya Nikolasi mono kema nehavi'ya amaugafa age hama'yema nehaya yafena tusi'a lamaipa kafa he ne'amatae. Nagayaenena ani'ama nehaya kava'amihena

naipa kafa he ne¹amatoe.

⁷ Nagi tamakesama hanesimogatama Avamu¹mo¹ma Yisasi kema haviya melitaluma nehaya vea¹mogamifema hia kea haviho. “Nago¹a vea¹mo¹ya Satani¹ene tuma hu¹ya agasesayana Anumayamo kumate ikapinaga hanea yosa, agola maige maige hisaya hamaimu amamisia yosamo alaga ‘Neho.’ hu¹na amamisuge¹ya negahae.” huno humaine.

Simena mono note mainaya veatega ma kemo¹a vie.

⁸ Simena mono note mainaya veate kava kanohena* mage huka kao nagaya uhagote¹na maite¹na haenagalafana mainoe. Fali-mainofitila ago ete¹na heti¹na mainoe. ⁹ Tamakaya kana yapi mainetama muki¹a yatamia omale vea¹ne mainayanagi Anumaya Koti¹a kanale yana ago tamamige¹na nagaya ago age-mainoe. Nago¹a vea¹mo¹ya “Tagaya Yuta vea¹ne mainone.” hu¹ya nehayanagi Yuta vea¹nea omainagi Satani anaga maine¹ya huhaviya hu-lamataya yana nagaya ago age-mainoe. ¹⁰ Tamakata aisia yana aligahayanagi kolia ohiho. Haviho Satani¹a aye lamavataga hisige¹ya nago¹a vea¹mogatamina nofila hulamategahae. Teni¹a (10) kanafi* ani kana ya¹ene tamakata aisia ya¹enena aligahayanagi havitama lamakupi malenaya yana atafa hulinetama falisage¹na ani yateti kanale miyana anonatamia maige maige hisaya tamahaimula tamamigahue.

11 Nagi tamakesama hanesimogatama Avamu'mo'ma mono note mainaya vea'mogamifema hia kea haviho. “Satani'enema tuma hutama agasesaya vea'mogatama tole yupama etetama falisaya yamo'a, hani yapima tegelege nehia atafina visaya yamo'a, ali haviya hu otamategahie hu'na nehue.”

Pegamumu mono note mainaya veatega ma kemo'a umaine.

12 Ma kemo'a Pegamumu mono note mainaya veate kava kanohena mage huka kao tole kaiyaga ave'ne'ne nehia naepe ka'yona alilinoa kanomo'na mage hu'na nehue. 13 Tamakaya Satani'ma mainea siamo hanea kumate mainage'na ago tamake-mainoe. Ani kumate mainayanagi nagai nagia atafa hulitama tokiya'age hulinageno nago kanoa, Atipasi'a, tamakai'ene maineanagino kolia ohunegi muki'a kanafina efi efi huno Yisasi kea huhaleno nehige'ya atafa hu'ya ani kumate hayageno falimaineanagi ani kanafi'enena tamakaya nagia atafa hulinetama nagai'fena havitama tamakupi malenaya yana o'atalenae. 14 O'atalenagi nago'a kefo yana nehageno naipamo'a haviyana nehie. Tamakai amu'nopina nago'a vea'mo'ya Palamu'ma humainea kea atafa hu'ya akave nemalae. Nayona Palamu'a Isaleli vea'mo'ya asaga hu lavisae huno Palakina mage huno hapai-mainae “Mage huka hamapaiyo ‘Amayateti talo humalenaya afa yafe ‘Anumayati maine.’ hutama amiya kavela nenetama kumai kavala

hiho.' huka amaipa ayesana kea hamapaiyo.”
 huno humaineane. ¹⁵ Na'a hianagi tamakaipitila
 nago'amo'ya Nikolasi'ma hia mono kemona
 akave nemalae. Ani kemo'a Palamu'ma hia
 avamete humainea ke. ¹⁶ Ani kefo yafena
 tamaku'a aiyahae hutama nago'ene ohisaya
 tamakesa haviho. Aiyahae ohisage'na nagaya osi
 kana kano'a maite'na tamakaitela esua'amo'na
 navayafima hanea ave'ne'ne naepe ka'yoteti
 amakai'enena tua hugahue.

¹⁷ Nagi tamakesama hanesimogatama
 Avamu'mo'a mono note'ma ne'vaya
 vea'mogamifema hia kea haviho. Satani'enema
 tuma hu'ya agase-mainesaya vea'mogamina
 falakino hanea kavela, manae hu'ya nehaya
 kavela ne'amami'na nagola efe'age yafatela
 hamaote hamaote haegafa amakima kae-
 malenoa yafana amamisuge'ya nago'a
 vea'mo'ya ani amakiyaga o'agegahagi agai'a
 yafama alisimo'a agai'age agegahie.

*Taiyataila maine'ya mono note ne'vaya
 veatega ma kemo'a umaine.*

¹⁸ Taiyataila maine'ya mono note'ma ne'vaya
 veate kava kanohena* mage huka kao nagaya
 Anumaya Koti nafa'nemonia naulagamo'a ata
 nefe'mo hia kava humainegenonaiyamo'a haesa
 yafamo vaga'yo vaga'yo hia kava humainege'na
 tokiya'age hu'na heti-mainoa kanomo'na mani
 kea nehugi kao. ¹⁹ Nagaya tamakai au'ava
 yatamia ago age-mainoe. Nagai'fena tamahau
 tamayamopafi nelamahaigetama havitama

tamametiti hutetama nagai ali'yama ali'iana mailava hutama tokiya'age humainage'na tamake-mainoe. Menima nehaya yamo'a hagotetama humainaya yamona ago agasetama kanale kava nehae. ²⁰ Nehayanagi nago'a kefo yama nehageno'a naipamo'a haviya nehie. Nago a'mo agia Yesepeli'e mage huno humaine “Nagaya Anumayamo aune a mainoe.” huno havigea nagai ali'ya vea'mogamina ayemavataga huno mage nehie “Kumai yana nehutama amayateti talo humalenaya afa anumayamoma amiya kavela neho.” huno humaine. ²¹ Hige'na nagaya ani a'mofena “Kumai yakahena kagu'a aiyahae huka nago'ene ohisana kagesa haviio.” hu'na agava mauvanagi agu'a aiyahae nohie. ²² Aiyahae nohiafe nagaya tusi'a agata aisia kalia ne'ami'na ani a'enema kumaima nehaya vea'nene kefo ya'amihema amakaye hu'ya amaku'ama aiyahae ohisage'nahena tusi'a kana yana amamigahue. ²³ Ne'amami'na ani a'mo kema akave nemalaya vea'mogamina hamaesuge'ya faligahae. Falisage'ya muki'a Anumaya Koti anaga'mo'ya agete'ya nagaya vea'mogami amaku amakesa tamagelegati'ma hu'na fako nehua kano mainoa yafena havigahae. Muki'a vea'mogatama nehaya kavala agete'na ago'ma humainaya yateti anonatamia tamamite lamamite hugahue.

²⁴ Hugahugi nago'a Taiyataila mainaya vea'mogatama ani a'mo kea akave omaletama Satani kema falakino hanea kema

ohavinaya vea'mogatama nago'a kahegi kea tamahaopaigahue. ²⁵ Tamahaopaigahugi muki'ama atafa hulinaya kea atafa hutama tokiya'age hu-linetama maima maima ne'vige'na nagaya ete'na ano. ²⁶ Satani'ene tuma hu'ya agase'ya nagai kema akave maleme maleme haisaya vea'mogamina nagaya tokiya'nia amamisuge'ya muki'a veatela kava yagaigahae. ²⁷ Nenafa'a tokiya namige'na kavama ne'yagauva tokiya'nia ani'a hu'na tamamisugeta tokiya'age hutama kava yagaigahae. ²⁸ Veamo'ya mopa susufanele'ma aiko neligeno aposino yagi-yagipe nelavia avamete kava hu'ya yagaigahae. ²⁸ Kava yagai-mainesage'na natema eva'yi nehia ka'nefi'mo'a tusiya huno aivasa huno hale yamaene ka'nefila tamamigahue.

²⁹ Nagi tamakesama hanesimogata Avamu'mo'a mono note ne'vaya vea'mogamifema hia kea haviho.

3

Satise maine'ya mono note ne'vaya veatega ma kemo'a umaine.

¹ Satise maine'ya mono note ne'vaya veate kava kanohena* mage huka kao nagaya seveni'a (7) Anumayamo Avamu'ene seveni'a (7) ka'nefi'yagaene nayapina atafa hulinoa kanomo'na mani kea tamahanepauve "Nagaya tamakai au'ava yatamia ago tamake-mainoanagi'ya veamo'ya tamakaifena 'Agola

maige maige hisaya hamaimu hanea veale.' hu'ya nehayanagi tamakaya nagai kema atalaya yafena ago fali-mainae. ² Faligahe hayanagi tamau'ma fae-maiya yana ne'ataletama hetitama kanale au'ava yatamia ali lokiya vaiho. Nagaya agoana au'ava yatamimo'a Anumayani'amo aufina fatago ohunae. ³ Ohuneanagitama ago'ma havi-mainaya mono kehena tamakesamo'a hao hinagetama akave maletama kefo yatamihena tamaku'a aiyahae hiho. Fae-mainesaleti'ma he otisayana nagaya 'Omegahie.' hutama hisaya kanafi musufa veya kana hu'na esua'amo'na kefo yamo anonatamia me lamamigahue. ⁴ Me lamamigahuanagi nago'a Satisi mainaya vea'mo'ya kanale'ya hageno amaku'amo'a oni'ya'agela ohunea vea'ne mainayanagi'ya efe'age kena'amia faimatesuge'ya amatesia kava hu'ya nagai'ene ailokae'ya vaiyegahae. ⁵ Vai ne'ayesage'na Satani'ene tuma hu'ya agase-mainaya veala efe'age kena faimategahue. Maige maige hisaya hamaimu hanesia vea'mogami amakima kae-malenoa avopi ani vea'mogami amakia haneanagi'na aye ohananegahuanagi'na amakai amakia Nenafa aule'ene ensole vea amaule'ene huhale'na hugahue.”

⁶ Nagi tamakesama hanesimogata Avamu'mo'a mono note ne'vaya vea'mogamifema hia kea haviho.

Filatelfia maine'ya mono note ne'vaya veatega ma kemo'a umaine.

7 Filatelafia maine¹ya mono note ne¹vaya veate kava kanohena* mage huka kao nagaya Anumaya Koti¹na alu aotage kanogi¹na tamagelafa nehue. Teviti¹ma kava yagai-mainea ki nofila nagaya ago ali¹na fita yaki-malenoanagino nago kanomo¹a eteno alino fita okigahie. Nagaya fita ago ali¹nama ki-malesugeno¹a nago kanomo¹a alino o¹yakigahie.

8 Nagaya mage nehue tamakai au¹ava yatamia ago age-mainoe. Ageho tamakai tamaufina fita ago yaki-malogeno visaya fiamo¹a hane. Ago¹ma yaki-malenoa fita nago kanomo¹a eteno alino okigahie. Tamakaya osi kano¹a tokiyatamia hanegetama nagai kea akave nemaletama nagai nagia ali fala okige¹na age-mainoe.

9 Haviho nago¹a vea¹mo¹ya mage nehae “Isaleli vea¹ne mainone.” hu¹ya havigea nehayanagi Satani vea¹ne mainayanagi¹na nagaya amakaila ali¹na tamaiyafinaga amatesuge¹ya “Ago tagase.” hu¹ya ape humaine¹ya nagaya tamakaifema nayamopafima nenahaiya yana amavelisuge¹ya agegahae.

10 “Kana yapina tokiya¹age hutama mailava hutama maiho.” hu¹nama hu-mainoa kea ago akave malenagi muki¹a ma mopafi vea¹mogamina avame¹ma humatesua yapina tusi¹a kana yamo falote hugahianagi¹na tamau vaisugetama tamakaya ani yapina omaigahae.

11 Nagaya naiyaye¹na aupa¹a egahugi. Atafa hulinaya kea atafa hutalako hulisayana nago¹a vea¹mo¹ya tamamisua kanale yana tamahaofalegahae.

12 Atafa

huline¹ya Satani¹enema tuma hu¹ya agase-
mainaya vea¹mo¹ya no yosamo avamete kana
hage¹na Anumayamo mono nopi aye¹na ali
hetimatesuge¹ya maigahayanagi¹ya ete¹ya
o¹utafa hu¹ya o¹ugahayanagi¹na amaugafale
Anumayani¹amo agiene Anumayani¹amona
ikapinagati esia kuma¹mo agia, haegafa
Yelusalemu kuma¹mo agiene nagaila haegafa
nagiene amaugafale kaemategahue.

¹³ Nagi tamakesama hanesimogatama
Avamu¹mo¹a mono note ne¹vaya
vea¹mogamifema hia kea haviho.

*Leotisia maine¹ya mono note ne¹vaya veatega
ma kemo¹a umaine.*

¹⁴ Leotisia maine¹ya mono note ne¹vaya
veate kava kanohena* mage huka kao nagaya
kelamage kemona aepa¹a maine¹na efi efi
hu¹na muki¹a kanafina kea huhale¹na nehue.
Nagaya muki¹a Anumaya Koti¹a ehe¹ma taloma
humalenea yamona aepa¹a mainoanagi¹na mani
kea mage hu¹na tamahanepauve. ¹⁵⁻¹⁶ Nagaya
tamakai au¹ava yatamia ago age-mainoe.
Nagai kemona tamakave¹nona ohunayanagi
tamakupina yasi¹age humainegeni amukoa
nohie. Nagai kemo¹a tamakupina amuko¹age¹ma
hu-mainele¹asina musena hule¹asinagi nagai kea
osi¹a tamakupina malenageno muvalisua naipa
nehige¹na nagaitegatila tamavale¹na haga¹yu
hu-lamatalesua nagesa nehie. ¹⁷ Tamakaya
mage hutama nehae “Kasago¹ya afeno¹yatia
hai ali-mainone. Nago ya kano¹ahena aupa

nohune.” hutama nehayanagi tamakaya havige nehagi haviyatafa hutama mainayanagi'ya vea'mo'ya tamake'ya kalagi ai-lama-tesaya avamete hutama muki'a yafena aupa hutama mainageno tamaulagamo'a asu hu-mainagetama tamaugafa alapa'age vea'ne kana hutama mainaya yafena tamakaitamia no'lagae. ¹⁸ Na'a humaineafe mani kea tamahanepauve mone afeno'ene vea'nema maisayafena nagaitegati kanileta yafana, atafi kae-malenaya yafana me miya hiho. Tamaugafa alapa'age mainageno tamakaye hisia yama aiso hisyafe efe'age kena me miya hutama failiho. Tamaulagafima falesaya masavena tamamisugetama falesageno tamaulagamo'a kanale hinagetama agegahae. Ani ya'yaga nagaiteti me miya hiho. ¹⁹ Nagaya nayamopafima nahaiya vea'mo'ya nagai kema havi'ya akave malesaya yafena ka'yo kevea ne'amamuafe aluya hutama lamakesa nehavitama kefo yatamihena tamaku'a aiyahae hutama “Nago'ene ohugahune.” hutama hiho. ²⁰ Ageho nagaya fiate heti-mainena tamakaifena kea nehuanagitama ani kema nagoke nagoke'mogatama havitetama fitama yaki-natesayana haifale'na tamakai'ene tokaeta maineta kavela negahune. ²¹ Nago'a vea'mo'ya Satani'ene tuma hu'ya agasesaya veafena mage hu'na humategahue “Nagaya Satani'enena tua hu'na agasete'na Nenafa'ma kava yagai-mainea sialela agai'ene me lokae'na mainoa avamete hutama nagai'ene kava yagaigahae.” hu'na

humategahue.

²² Nagi tamakesama hanesimoga-tama Avamu'mo'a mono note ne'vaya veafema hia kea haviho.

4

Ikapinaga maine'ya Anumaya Koti agia alisaga nehae.

¹ Yoni'a mage huno hie ani kemo'a ha'noma hige'na agoana ikapina nago fita yaki-malenea fiana age-mainoe. Ne'agogeno hagote'nama ufema nehia augafa agema aige'na havua augafa kea nago'ene havuana mage huno hie “Male ehaige'na muki'a yama anile'ma falote hisia yana kavelino.” huno hie. ² Higeno aupa'a Anumaya Koti Avamu'mo'a tusiya huno natafa hige'na agoana ikapinaga nago sia agogeno ani siale nago kanoa maine. ³ Ani siale'ma mainege'na agoa kanomo augafamo'a tusiya huno aihuesa huno alave alave huteno aihalege'na age-mainoe. Agogeno nago'ma alave alave hiana yosa haisa fulagena'mo'a sauve kanomo siale aigagi-maineno aihanelege'na age-mainoe. ⁴ Ne'agogeno tueti fo'a (24) sia ani sauve kanomo siale maigagi-mainage'ya tueti fo'a (24) kava vaya'mo'ya ani siayagale mainae. Maine'ya efe'age kena'amia failine'ya amanutela sauve vea'mo'ya kanileta yafateti talo humale tumano ku'ma vai ne'aliya avamete hu'ya vai-linae. ⁵ Anumaya Koti sialeti aulumaya alino monagemo huno alu ge lu gema

aiya yamo¹a anifiti falote humaine. Anumaya Koti siamo aulega seveni¹a (7) lamua aivasa humaine. Ani lamua Anumayamona seveni¹a (7) Avamu¹amo¹ya mainae. ⁶ Mainageno Anumaya Koti siamo aulega nago tikotuna hanegenotelelalayama¹a tamage huno omalegenogalasimo¹ma alave alave hia avamete humaine. Fo¹a (4) hamaimu¹ene anaga¹mo¹ya heti¹ya ani siale maigagi¹ya mainageno amaulaga kasago¹ya haneteno amaulegaene amakavelagaene alino ano¹vai-maine. ⁷ Hagote haimu¹ene kanomo¹a kave¹age afua, laiyoni afu kana higeno anile haimu¹ene kanomo¹a pulamaka kana higeno anile haimu¹ene kanomona vaya augosa kali-maigeno anile haimu¹ene kanomona anale haleno vai ne¹ayea haki kana nama kana humaine. ⁸ Ani fo¹a (4) hamaimu¹ene anaga¹mo¹ya sikisi¹a (6) amageko¹na hanegenokasago¹ya amaulagamo amaugafamona agupilegaene amageko¹namona afepinagaene alino vai-maine. Vai-mainageno felugaene kege¹ene mage hu¹ya huge huge nehae

“Anumaya Koti¹a muki¹a tokiyamona aepa¹a maineno kefo yana nohigi tusiya huno alu aotage kano maine. Nayo¹ene meniene maineanagino haenaga¹a maisia kano maine.” hu¹ya humainae.

⁹⁻¹⁰ Hamaimu¹ene anaga¹mo¹ya sauve kanomo siale maiya kanoa, agola maige maige nehia kanomofena, mage hu¹ya hae “Tokiya¹age hale yama¹a hanea kagia alisaga nehuta tusi¹a muse

nehune.” hu'ya nehage'ya ani tueti fo'a (24) kava vaya'mo'ya sauve kanomo siale maiya kanoa agola maige maige nehia kanomo aule mope hu'ya agia alisaga hugahe ali-mainaya kanileta yafateti talo humale tumano ku'amia ali'ya ani siamo aiyafi mo malae. ¹¹ Mo nemale'ya mage hu'ya hae

“Vaeha tagai Anumaya Kotigae kagaya muki'a yana 'Na'a hu'na talo hugahue.’ huka humainanafe muki'a yana talo humalanageno haneafe tagaya tokiya'age hale yama'aene kagia alisaga nehuta tokiya'age kano mainane huta kagia alisaga nehune.” hu'ya hae.

Hage'na nagaya Yoni'na himona kana yapi age-mainoe.

5

Yoni'a nagola avoma kae-male omana ha'ya ki-malenegeno age-maine.

¹ Nagaya Yoni'nae agoana ani sauve kanomo siale'ma maiya kanomona tamaga ayapina nagola avoma kae-male omana aye-gafage ki-malegeno hane. Ani omanamona amegaene agusafinagaene avona kae-maleteno vea'mo'ya o'agesayafene huno atupale seveni'a (7) menimo fuki kana yateti aye ka'mae-malene. ² Aye ka'mae-malenege'na agoana nagola tokiya'a hanea ensole kanomo'a ala kegefafiti keha keha huno mage hie “Hana kanoa atesia

kanomo anima menimo fukiteti aye ka'mae-malegeno hanea omana ali vaka yegahie?" huno hie. ³ Hige'na agoana atiye'yama agayana ikapinagaene mopafi'ene mopamona afepinagaene nagola ani avoma ali vaka yesigeno atesia kanoa omaine. ⁴ Nagola ani avoma kae-male omanama ali vaka yesigeno atesia kanoa omaige'na agete'na tusiya hu'na avia atemainoe. ⁵ Ne'atogeno tueti fo'a (24) kava vayapiti nago kanomo'a nagaifena mage huno hie "Avia o'ateka havio nago kanoa Teviti aginagomo'a, kave'age laiyoni afu kana humainea kanoa, Yuta nofipiti kanogino, Satani'ene tua huno ago agasemaineafe ani avoma kae-male omana seveni'a (7) menimo fukiteti aye ka'mae-malenea yana ali hakao huteno ali vaka-yegahie." huno humaine.

Yoni'a Sipi sipi nafa'nea age-maine.

⁶ Ani sauve kanomo siamo amu'nopina nagola Sipi sipi nafa'nea heti-mainege'ya fo'a (4) hamaimu'ene anaga'yaene tueti fo'a (24) kava vaya'mo'yaene agaila mai kagi-mainage'na age-mainoe. Agoana ani Sipi sipi nafa'nea maiyanagi hayageno'ma fali-mainea afu kana huno seveni'a (7) ave'ene seveni'a (7) aulagaene hane. Ani aulagayaga seveni'a (7) Anumaya Koti'a hutegeni muki'a ma mopafi vaiyatete nehia Alu Aotage Avamulagi'ya mainae. ⁷ Ani Sipi sipimo nafa'nemo'a via'amo sauve kanomo siale mainea kanomona tamaga ayapiti ani avoma kae-male omana ali-maine. ⁸ Alige'ya fo'a (4) hamaimu'ene anaga'yaene tueti fo'a (24) kava

vaya¹mo¹yaene ani Sipi sipimo nafa¹nea avate mope hu¹ya muki¹amo¹ya gita kana yana yagame nehaya ya¹ene kanileta yafateti talo hu-malenaya yopaene atafa hulinae. Ani yopafina mana¹age halinamo humainea ta¹nefamo¹a havate-maine. Ani mana¹age halinamo¹a ma¹a humaine vea¹mo¹ya nunamuma nehu¹ya Anumayamo agima alisaga nehageno Anumayamo avate vigeno havigeno aipamo¹a kanale higeno haga¹age manama nehavia kava humaine. ⁹ Ani anaga¹mo¹ya Sipi sipi nafa¹nemofena mage hu¹ya yagamea humainae

“Kagaila kahayageka fali-mainana kolateti ma mopafi vea¹mogamina, alu kote kotega vea¹nene, alu make alu make ne¹aiya vea¹nene, alu amaugafa alu amaugafa kalimainea vea¹nene, kefo ya¹amimo alino ha¹yagimatenegeka kagayama fali-mainana kolateti anifiti aligalu heka amavayu huteka Anumaya Koti vea¹ne maisaya yafe muki¹a ago miya humatenane. Miya humatenanafe kagaila kanale ya huno katea kava hana kano mainananagika anima aye-gafage ki-malete¹ya menimo fukiteti aye ka¹mae-malenea avo omana alika ali hakao hisana tokiyaka¹a hane. ¹⁰ Anumaya Koti¹a kava yagai-lamatesia yapi ago amatanage¹ya Anumaya Koti agia alisaga nehu¹ya agai ali¹yana ne¹ali¹ya ma mopafi vea¹mogamina kava humategahae.” hu¹ya yagamea hage¹na havimainoe.

Sipi sipi nafa'nemo agia alisaga humainae.

¹¹ Havite'na agoana kasago'ya ensole vayala teni milioni'a (10,000,000) ensole vaya'mo'ya hetil'ya Anumaya Koti'ma nemaiya siale'ene fo'a (4) hamaimu'ene anagaene tueti fo'a (24) kava vaya'mo'yaene maigagi'ya maine'ya ala kegefafiti mage hu'ya hage'na havimainoe.

¹² “Ani Sipi sipi nafa'nea hayageno faliteno heti-mainea kanogino tusi'a kanale kano maineanagino atesia napama'a aliteno tusi'a tokiya'a hanenageno muki'a kanale ya'ene kanale havi havi'ya'ene hanea kanogino kava hisia tokiya'aenena haneanagita tokiya'age hale yamaene agia alisaga hisunageno anale hanesigeno muki'a muse hisia yana alisie.” hu'ya hae.

¹³ Hage'na havugeno muki'ama Anumaya Koti'a talo humalenea yamo'a ikapinaga mainaya ya'ene mopafima mainaya ya'ene mopamo agusafinagama mainaya ya'ene tipima mainaya ya'enena muki'amo'ya mage hu'ya hae

“Sauve kanomo siale mainana Anumaya Kotigaene Sipi sipi nafa'nene agola muki'a kanafina muse hisa'a yamo'a hanege hanege huno hanesie. Tokiya'age hale yama'aene tanakia haneanagita alisaga hisunageno anale hanesigetana kava hisa'a tokiyatanimu'a hanege hanege huno hanesie.” hu'ya hae.

¹⁴ Hage'ya fo'a (4) hamaimu'ene anagamo'ya “Tamage hu'ya hae.” hage'ya tueti fo'a (24) kava

vaya'mo'ya ape hu'ya Anumayamo agia alisaga humainae.

6

Sipi sipi nafa'nemo'a menimo fukiteti aye ka'mae-malenea fukina ali hakao humaine.

¹ Nagaya Yoni'na agoana Sipi sipi nafa'nemo'a ea'amo nagola menimo fukiteti aye ka'mae-malenea fukina ago melino hakao hige'na havuana fo'a (4) hamaimu'ene anagapiti nago'mo'a agea aige'na havuana agema aiya agemo'a monagemo'ma hia avamete huno mage hie “Male eno.” huno hie. ² Hige'na agoana nagola efe'age hosi afua agogeno nago kanomo'a ani afumo agupifi maineno ati kevea huno atafa hu-lineno tumano kula, vaya'mo'ya kame vaya'amima tuma hu'ya amakase-mainaya vaya'mo'ya vai ne'aliya tumano kula amigeno nago'ene kame vaya'amienena tua huno amakasegahe umaine.

³ Vigeno ani Sipi sipi nafa'nemo'a anile menimo fukiteti aye ka'mae-malenea fukina melino hakao hige'na havuana fo'a (4) hamaimu'ene anagapiti anile tu (2) molia kanomo'a mage huno hie “Male eno.” huno hie. ⁴ Hige'na agoana nagola kolama'age hosi afua agogeno nago kanomo'a ani afumo agupifi mainegeni ala ave'ne'ne naepe ka'yo'ene muki'a ma mopafi vea'nene tuma hisia tokiya'aene amigeno aliteno ma mopafi vea'mo'ya tuma hu'ya hamaesage'ya falisaya

amakesa ago amamineanagino amaipa falu hu'ya maisaya yamo'a muki'a ma mopafina ago ha'no humaine.

⁵ Ani Sipi sipi nafa'nemo'a tagufa (3) molia menimo fukiteti aye ka'mae-malenea fukina melino hakao hige'na havuana fo'a (4) hamaimu'ene anagapiti tagufa (3) molia kanomo'a mage huno hie “Male eno.” huno hige'na agoana nagola anupa hosi afua agogeno nago kanomo'a ani afumo agupifi maiya kanomo'a sigelima nehaya yana ayapi alilino emaine. ⁶ Alilino mainege'na ne'age'na havuana fo'a (4) hamaimu'ene anagapiti nago agema aige'na havua agemo'a mage huno hie “Nago kanomo'a nagoke yupa nate aepa heno ali'yana alime alime visia'amo unema ha'no hisige'ya amisaya miyateti tole osi ke'ayopi laisimo alaga fako huka amamio. Ani avamete miyana kamisageka sikisi'a (6) maya ani'a huka amamio. Ani'a huka amamigananagi olivi yosama hanea yosamo alagafiti masavema ne'aliya yosayagaene nofi alagamo tima'a ali'ya tatite'ya nenaya nofi'ene alika haviyana ohuo.” huno hie.

⁷ Hige'na agoana Sipi sipi nafa'nemo'a foa (4) molia menimo fukiteti aye ka'mae-malenea fukina melino hakao hige'na havuana fo'a (4) hamaimu'ene anagapiti foa (4) molia kanomo'a mage huno hie “Male eno.” huno hie. ⁸ Hige'na agoana nagola kanileta hosi afua agogeno ani afumo agupifi maiya kanomo' agia “Vaya fali yamo'e.” hu'ya ne'ayaya kanomo akave'ma

via kanomo agia “Fali-mainaya vea'ne ne'vaya kumale.” hu'ya agia ne'ayaya kanomo'a akave vige'ana va'ana ani tole kanolatamogania tusi'a tokiya anamige'ana muki'a ma mopafi mainaya veala ali fako hu'ana fo'afi (4) amatage'ya maiya anagapiti nago'a vea'mogamina he-falimatesia tokiya'ania ali-maina'e. Ali'age'ya nago'amo'ya tu hute'ya fali-mainagi nago'amo'ya kafu hu'ya amakatege'ya fali-mainagi nago'amo'ya alu kali lu kali ali'ya fali-mainagi afai kalamo'ya nago'amogamina hamaesage'ya falisaya tokiya'ania ali-maina'e.

⁹ Na'a higeno Sipi sipi nafa'nemo'a faefua (5) molia menimo fukiteti aye ka'mae-malenea fukina melino hakao hige'na agoana Anumayamofe amakesa havi'ya sipi sipia he'ya folamole kae salamana hu'ya nemalaya folamo kana folamoa ikapinaga hanege'na agogeno ani folamomo aiyafina Anumaya Koti kema havi'ya atafa hu-line'ya huhale'ya humainaya yateti'ma hamayage'ya fali-mainaya vea'mogami amamena amake-mainoe.

¹⁰ Agoge'ya ani amamemo'ya ala kegefafiti mage hu'ya hae “Tokiyaka hanea Anumayatimogae alu aotage kanomoga tamagege'ya nehane. Ma mopafi vea'mo'ya tahayageta faliteta malela emainonanagika ani'ama humainaya yatetila kagaya na yu kaiyekea hu-mateteka kefo ya'amimo anona'amia amamigane?” hu'ya hae.

¹¹ Nehageno efe'age aya'aya kena'amia alino amamiteno mage huno hamapaiye “Maifalu

hutama mainege'ya tamafu-tamakana'ya tamakai'ene Yisasi ali'yama ne'ali'ya agai kema huhale'ya nehaya yateti tamakai'ma hulamatenaya kava hu'ya hamaesage'ya falite'ya esage'na kame vayatamia kaiyekea humategahue.” huno hie.

¹² Huteno Sipi sipi nafa'nemo'a sikisia (6) molia menimo fukiteti aye ka'mae-malenea fukina melino hakao hige'na agoana tusi'a imi aligeno yagemo'a asu huno hanima'age higeno ikamo'a haesa ko tino kola kana humaine. ¹³ Higeno yasimo'a yosamona mo lifagagi me lifagagi higeno afuma otenea yosa alagamo'a halali hulavia kava huno ka'nefi'yagamo'a ikapitila atafai-lavi-maine. ¹⁴ Ikamo'a iva yuguma alitama aye kafage kitama ha'yama negiya kava huno ikamo'a fanane higeno muki'a ago'yaene ti amu'nopima hanea mopaene no'amia atale'ya nago'ene omalena. ¹⁵ Na'a higeno muki'a ma mopafi mainaya sauve vaya'yagaene kava vaya'yagaene ati vayate kava vaya'yagaene miya'amimo hai-mainea vea'nene tokiya'amima hanea vaya'ene nofipi maine'ya miya o'ali ali'ya ne'aliya vea'nene amakai'ami ali'ya'amile nemaiya vea'nene tusi'a amama'yo aige'ya “Hanate maisune.” hu'ya hute'ya yafakapi'ene ago'yafi hanea ala yafakefamo akavelega fale'ya mo falaki'ya mainae. ¹⁶ Fala ki'ya maine'ya keha keha hu'ya muki'a ago'yahe'ene yafafe'ene mage hu'ya hae “Tagaya sauvemo siale mainea kanoa Anumaya Koti aule omaisuna tagesa

nehune. Sipi sipi nafa'nemo'a tusi'a hai vai nelategeta koli nehunagi ago'yamogatama kofa hu-lavitama tagaila etama aiso hulateho. ¹⁷ Ala kanolatamogania hanai vai-late'ana kaiyeke hulatesa'a kanamo'a ago falote hianagi'ya hana'a augafa vea'mo'ya anaulela hetigahae?" hu'ya hage'na haenagama falote hisia yana himona kana yapi agete'na havilinoe.

7

Vani hataleti foti fo tauseni'a (144,000) Isaleli vea'mogamina Anumayamo avona hamanile aiga'maema-tene.

¹ Ani kema havite'na agoana fo'a (4) ensole vaya'mo'ya fo'a (4) ma mopamo atupalega heti-maine'ya yasimona atafa hu'ya ali-talako huligeno yasimo'a taga higeno mopafima hanea yamo'ene hagelimo'ene yosayagamo'enena kanage kanagala ohunae. ² Ohage'na agogeno nago ensole kanomo'a yagemo'ma eva'yi nehilegati ea'amo haimu'ma hanea Anumaya Koti'a agai'a vea'mogami humatenea avona aiga'maematesia yana ayapi atafa hulineno ani fo'a (4) ensole vayala mopaene hageli'ene ali haviyama hisaya tokiya'amima amaminea ensole vayafe mage huno ala kegefafiti hamapaiye. ³ "Tamakaya mopaene hageli'ene yosayagaenema ali haviyama hisaya ensole vaya'mogatama ne'ataletama tagava mainegeta tagaya hagoteta Anumaya Kotitimo ali'ya vea'mogami hamanilela Anumayamo'ma

humatenea avona aiga¹mae-matetesunagetama ani ya¹yaga ali haviyana hugahae” huno hie. ⁴ Hige¹na havugeno huyogino hamanile avoma kae-malenea vea¹nea vani hataleti foti fo tauseni¹a (144,000) Isaleli vea¹nea alu nofipiti alu nofipiti huyogi-malenea ve¹nea agoe. ⁵ Yuta nofipiti tuelufu tauseni¹a (12,000) vea¹nene Lupeni nofipiti tuelufu tauseni¹a (12,000) vea¹nene Kati nofipiti tuelufu tauseni¹a (12,000) vea¹nene huyogi-malene. ⁶ Asa nofipiti tuelufu tauseni¹a (12,000) vea¹nene Napatalai nofipiti tuelufu tauseni¹a (12,000) vea¹nene Manase nofipiti tuelufu tauseni¹a (12,000) vea¹nene huyogi-malene. ⁷ Simioni nofipiti tuelufu tauseni¹a (12,000) vea¹nene Livai nofipiti tuelufu tauseni¹a (12,000) vea¹nene Isaka nofipiti tuelufu tauseni¹a (12,000) vea¹nene huyogi-malene. ⁸ Sepuluni nofipiti tuelufu tauseni¹a (12,000) vea¹nene Yosefe nofipiti tuelufu tauseni¹a (12,000) vea¹nene Penisamini nofipiti tuelufu tauseni¹a (12,000) vea¹nene huyogi-malene.

Kasago¹ya vea¹mo¹ya Anumaya Koti agia alis-aga humainae.

⁹ Kasago¹ya vea¹nea ohavunama¹a vea¹nea alu kotega alu kotega vea¹nene, alu make alu make ne¹aiya vea¹nene, alu amaugafa lu amaugafa kali-mainea vea¹nene, muki¹a Anumaya Koti sauve kanomo siamo aulegaene Sipi sipi nafa¹nemo aulegaene heti-mainel¹ya efe kena aya¹aya kena¹amia failinel¹ya fa¹nofamo

haisa amayapi atafa huli huli hulinae. ¹⁰ Huline¹ya ala kegefafiti mage hu¹ya hae “Sauve kanomo siale mainea Anumaya Kotitimo¹ene Sipi sipi nafa¹nemo¹ene tagu tamema ago aligati-mainea yamona aepa¹a maina¹e.” hu¹ya hae. ¹¹ Nehage¹ya muki¹a ensole vea¹mo¹ya het¹ya Anumaya Koti¹ma mainea siale¹ene tueti fo¹a (24) kava vaya¹mo¹yaene fo¹a (4) hamaimu¹ene anaga¹mo¹yaene maigagi¹ya maine¹ya muki¹amo¹ya ani siale ape hu¹ya Anumaya Koti agia alisaga nehu¹ya mage hu¹ya hae.

¹² “Tamage Anumaya Koti¹a muki¹a muse hisia yana alisie. Tokiya¹age hale yama¹aene agia haneanagino kanale havi havi¹yama¹a hanea kano maineafe agia alisaga nehuta tusi¹a muse hutesune. Agai¹a kava yagaisia tokiya¹amo¹a agola hanege hanege huno hanesie. Tamage.” hu¹ya humainae.

Ani anaga¹mogamina amakatama ne¹aiya yamo¹a menia agola ha¹no hie.

¹³ Ani kea hu ne¹atageno nagola ala kava kanomo¹a nagaifena mage huno nahavige “Nama aya¹aya efe kenama fai¹linaya veala ta¹yae? Hanategati emainae?” huno nahavige-mainie. ¹⁴ Nahavigege¹na nagaya, Yoni¹na, mage hu¹na hue “Museka¹a nehugi kagaya kagaika¹a havilinane.” hu¹na hugeno nagaifena mage huno hie “Mani vea¹mo¹ya tusi¹a kana yama hanea kanafi maine¹ya tokiya¹age hu¹ya

kefo ya'amihema havi'ya fali-mainea Sipi sipi nafa'nemo kolateti kena'amia agola sese hageno efe'age hu-maineanagi'ya emainae. ¹⁵ Ani yafe amakaya Anumaya Koti'ma mainea siamo aulega heti-maine'ya felugaene kege'ene agai agia alisaga nehu'ya agai ali'ya ne'aliyanagino Anumaya Koti'a au vaimateno kava yagaimategahie. ¹⁶ Yagai-mateneanagino nago'ene amakala oteghahie. Tifena o'amakegahie. Yagemo'a amuko-nako huno amaleno o'amasagaligahie. ¹⁷ Sipi sipi nafa'nemo'a Anumaya Koti mainea siamona aulega hanea amu'nopi hetino maineno sipi sipi kava kano'ami maineanagino kapai'ma nehagea tima hanea komulega amavaleno mo matenage'ya maige maige hisaya tina nenesageno Anumaya Koti'a amaunua alino ha'mi-matesige'ya nago'ene avia o'ategahae." huno hige'na nagaya Yoni'na havimainoe.

8

Sipi sipi nafa'nemo'a sevenia (7) molia menimo fukiteti aye ka'mae-malenea fukina ali hakao hu-maine.

¹ Ani Sipi sipi nafa'nemo'a haenagalafana menimo fukiteti aye ka'mae-malenea yana melino hakao hige'na agogeno muki'a ikapinagama hanea yamo'a kanage kanagela ohu'ya muki'a yamo'a kea ohigeno vani'agi hafu aovamo'a eumaine. ² Eutege'na anile agoana seveni'a (7) ensole vea'mo'ya Anumaya

Koti aule heti'ya mainageno seveni'a (7) ufena amamige'na age-mainoe.

³ Agogeno nago ensole kanomo'a nagola kanileta yafateti talo hu-malenea yopa ayapi ali-linegeno afuma he'ya folamole kae salamana hu'ya nemalaya folamo kana folamole* heti-mainegeno kasago'ya mana'age nehia ta'nefamo halinamo'ene Yisasina amaku'a aminaya vea'mo'ya nunamuma hu'ya havigaya nunamu'ene ani yopafina ali malesigeno ailokaeno'ma haisiana Anumayamo'a kanale mana'a havisiafene huno sauve kanomo siamo aulega kanileta yafateti talo hu-malenea folamo hanea folamole mo malene.

⁴ Momalegeno ani mana'age halinamo'ene Anumaymona amaku'ama aminaya vea'mogami nunamu'yagaene ani ensole kanomo ayapitila atale'ya Anumayamo aule haimainae. ⁵ Haigeno ani ensole kanomo'a kanileta yafateti talo humale yopa alino folamole atama nelea ata ani yopafi maleno havateteno alino ani ata ikapinagati ma mopafi haga'yu hu-talegeno elavigeno ikapinagatila akali kalu huno aulumayala ne'aligeno nagola ala agegefa ne'aigeno imila ali-maine.

Fo'a (4) ensole vaya'mo'ya ufena humainae.

⁶ Seveni'a (7) ufema atafa hu-linaya ensole vaya'mo'ya ani ufema hisaya yafe talo tala humainae. ⁷ Hagote ensole kanomo'a agai'a ufena higeno ko'mopamo'ene atamo'ene ko-lamo'ene atagufe-lavino mopafi tavigeno muki'a

ma mopa tagufale (3) ali fako hu-malageno anifiti nagoke¹ma ali fako hu-malaya haupa kaiyaga muki'a mopafi hanea ya¹ene muki'a yosaya-gaene muki'a ape¹ene atamo'a teno asagali-talene.

⁸ Asagali-talegeno tu (2) molia ensole kanomo'a agai'a ufena higeno ala ago¹ya kana yana ata nelegeno hagelipi tavi-mainae. Ani hage-limona tagufale (3) ali fako hu-malageno anifiti nago haupa kaiyaga hanea timo'a kolama¹age huno vali vali humaine. ⁹ Kolamo'a vali vali higeno ani haupa kaiyagama mainaya noyameyagaene tipi yagaene fali ha¹no hageno ani haupa kaiyagama hanea tipi kaleyaga ali haviya hu-talageno anifima mainaya veala fali ha¹no humainae. ¹⁰⁻¹¹ Faligeno tali (3) molia ensole kanomo'a agai'a ufena nehigeno ka¹nefila ala ka¹nefekefamo agia “Atu¹age nehuno satu¹age ka¹nefile.” hu¹ya nehayanagino'a ka¹ni¹moma nelea avamete huno ikapinagatila elavia¹amo muki'a ma mopamona tagufafi (3) melino fako hu-malageno anifiti nago haupa kaiyagama hanea ti¹yagaene tima kapai¹ma nehagea ti komufi hanea timo¹ene atu¹age hige¹ya muki'a ani lima ne-mainaya vea¹nea fali-mainae.

¹² Faligeno fo (4) molia ensole kanomo'a agai'a ufena nehigeno yagemo'a tagufafi (3) ali fako hu-malageno anifiti nago haupa kaiyaga asu humaine. Ani'a hu¹ya ikana tagufafi (3) ali fako hu-malageno anifiti nago haupa kaiyaga ani'a huno asu humaine. Ka¹nefi¹yaga tagufafi (3) ali fako

hu-malageno anifiti nago haupa kaiyaga ani¹a huno asu humaine. Asu hu-maigeno felugama aye vasa nehia ya¹amimo¹a tagufafi (3) ali fako hu-malageno anifiti nago kanafina asu higeno kegela tagufafi (3) ali fako hu-malageno anifiti nago kanafina ika¹ene ka¹nefi¹ene asu higeno tusi¹a haniki-maine.

¹³ Nagaya Yoni¹na agogeno nagola ala hakiki kana nama ikamo amu¹note haleno vige¹na age-mainoe. Ne¹agogeno ala kegefafiti mage huno hie “Avo¹nio avo¹nio tagufa (3) ensole anaga¹mo¹ya ufena nehisageno tusi¹a kana yamo¹a ma mopafi mainaya vea¹mogatamile falote hugahe hige¹na tusi¹a nahau hu nelamatoe.” huno hige¹na havue.

9

Faefu (5) molia ensole kanomo¹a agai¹a ufena humaine.

¹ Faefu (5) molia ensole kanomo¹a agai¹a ufena hige¹na agogeno nago ka¹nefimo¹a ikapinagati atafai-lavino mopafi elavigeno ma mopafina nago komua afe yapi tavi-mainea komumona ayola omale komugefagino ani komumo ki nofila ani ka¹nefimona amine.

² Amigeno aliteno ani ki nofiteti ani komua yakigeno ani komufitila tusi¹a halinamo huno ehaiyana tusi¹a atagefafiti hia halinamo avamete huno ehaiya¹amo yagene ika¹ene ayesu higeno tusi¹a hani kimaine. ³ Kigeno kasago¹ya ke¹nu kafamo¹ya ani halinafitila mopafina aitagu-fetageno vea¹ma akafu amanisaya tokiya¹amia

amamige¹ya akafu¹ma amani yana kulumale nehaya osifa¹vemo¹ma ne¹amania avamete huno amanige¹ya tusi¹a amakata aimaine. ⁴ Ani ke¹nufena mage huno hie “Ape¹ene tala¹ya¹ene yosayagaenena oneho. Nago¹a vea¹nege, Anumaya Koti¹a hapalimateteno agia hamanilela aiga¹mae o¹amatenea vea¹mogamina akafu amanitama ali haviya humateho. ⁵ Faefu¹a (5) ikana amakata aisia yana amamite amamite hugahayanagi hamaege¹ya ofaliho.” huno hige¹ya akafu amanige¹ya amakata yama aliyana kulumale nehaya osifa¹vemo¹ma vea¹ma akafu ne¹amania avamete huno amanige¹ya tusi¹a amakata aimaine. ⁶ Ani yama alisaya kanafina vea¹mo¹ya falisaya yafena tusiya huno hamaugahianagi ofaligahae. Amakatama aiya yafena tusiya hu¹ya falisaya kafena ati yegahayanagi o¹agegahae.

⁷ Ani ke¹numo¹ya tuma hugahema nehaya hosi afumo avamete hu¹ya amanutela kanileta yafateti talo humale tumano kula vai-linageno amaugosamo¹a vea¹mogami amaugosa kali-mainaine. ⁸ Kali-maige¹ya ani ke¹numo¹ya aya¹aya amayolagefa, haesa a¹nemogami amayolagefa kana hu-mainegeno amave¹mo¹a kave¹age laiyonni afumo ave kana humaine. ⁹ Humainege¹ya hamaifi¹yafafina kapaleti talo humale halegu kana yana ano¹vai-malene¹ya amageko¹na agema aiyana tuma hugahe veya hosimo¹ya avayu nehaya kalemo nehia kea ala kegefa huno ne¹aiya agemo¹ma hia kava huno

agea aimaine ¹⁰ Ani ke'numo amaigo'yafina aveta'nafa'age neka'ya, kulumale nehaya osifa'vemo akafu ne'amania ave kana hia neka'ya, hanege'ya ani neka'yaleti faefu'a (5) ikamo agu'afina veala akafu amani'ya ali haviya humategahae. ¹¹ Ani ke'numo sauve kano'amia maineanagino ani kava kano'amimo'a Satani'e, ayo'a omale komugefale kava yagai-maineanagino agia Yuta vea'mogami kea, Hipalu kefina Apatonie hu'ya nehagi Kaliki kefina Apolonie hu'ya nehagi tagaiti kefina mage humaine “Vea alino haviya hinage'ya fali ha'no hu-matesia kanoe.” humaine.

¹² Ke'numo'ya ali haviya humatesaya kanamo'a ha'no hianagi avo'nio tolea tusi'a kana yatala falote hisa'a yafena nahau hulamatoe.

Sikisi (6) molia ensole kanomo'a ufena humaine.

¹³ Sikisi (6) molia ensole kanomo'a agai'a ufena hige'na havugeno Anumaya Koti aule'ma kanileta yafateti talo humale folamomo fo'a (4) atupale hanea avela fo'a (4) avepitila agea aige'na havimainoe. ¹⁴ Havugeno ufema atafa hulinea ensole kano sikisi (6) molia ensole kanomofena mage huno hie “Fo'a (4) ensole vayala, Yufaletisi titegama nofi'ma humatenaya ensole vayala kalu heka amatalege'ya viho.” huno hie. ¹⁵ Higeno “Anumaya Koti'a na kafufina na ikatela na kanafina na aova'a ani fo'a (4) ensole vaya'mo'ya muki'a ma mopafi vea'mogamina tagufafi (3) ali fako

humalageno anifiti nago haupa kaiyagama mainesaya veala hamaesagetama faligahae.” huno huteno amatafa hu-lineane. Ani kanamo¹a efalote higeno ani ensole vayala kalu heno amatalege²ya ani kavala nehae. ¹⁶ Ani kava³ma nehisage⁴ya amaya hu⁵ya hamaesaya ati vaya⁶amia tu hataleti milioni⁷a (200,000,000) hosimo agupifi mainaya ati vayala mainae hu⁸ya hage⁹na nagaya Yoni¹⁰na havimainoe. ¹⁷⁻¹⁸ Havite¹¹na himona kana yapi amakoana ani hosimogami amakupifima mainaya vaya¹²mo¹³ya hamaifi¹⁴yafafina halegula haesa¹⁵ene oko¹⁶ene kanileta¹⁷ene halegula aye hai-linageno hosimogami amanutela kave¹⁸age afua laiyoni afumogami amanu kana hutegeni amavayafitila atamo¹⁹ene halinamo²⁰ene hi²¹mana²²age atama nelea yafa²³yagaene falote huno muki²⁴a ma mopafi vea²⁵mogamina tagufafi (3) ali fako hu-malageno anifiti nago haupa kaiyaga vea²⁶mogamina ani ataene halinamo²⁷ene hi²⁸mana²⁹age atama nelea yafa³⁰yagaleti³¹ene hamayage³²ya fali-mainae. ¹⁹ Hosimogamina hamaesaya tokiya³³amia amavayafi³⁴ene amaigo³⁵yafi³⁶ene hanegeni amaigo³⁷yamo³⁸a osifa³⁹ve kana huno akafu amanisia amanuna hanege⁴⁰ya veala akafu amanige⁴¹ya hamae-mainae.

²⁰ Anima tusiya huno ali haviya hia yamo⁴²ma ohamaenea vea⁴³mo⁴⁴ya agayanagi kefo yama humainaya yafena amaku⁴⁵a aiyahae nohae. Kanileta yafateti⁴⁶ene siliva yafateti⁴⁷ene haesa yafateti⁴⁸ene afa yafateti⁴⁹ene yosaleti⁵⁰ene talo

hu-malenaya yafena “Anumayati mainae” hu'ya hayanagi ani ya'yaga amaulaga o'age'ya kea ohavi'ya kama vai o'aye'yama nehaya afa anumayamo-gamiene Kefo Avamu'mogami amakiene alisaga hu'ya “Anumayati mainae.” hu'ya nehaya kavala o'atalenae. ²¹ O'atalene'ya vea'ma hamae nefaliya ya'ene analisama nehaya ya'ene kumaima nehaya ya'ene musufa yama hu-lite'ya nehaya ya'enefena amaku'a aiyahae nohae.

10

Ensole kanomo'a avoma kaemale omana Yonina amigeno nemaine.

¹ Anile nagaya Yoni'na agoana nagola tokiya'age ensole kanoa ikapinagati elavino ege'na age-mainoe. Ani ensole kanomo augafamona sia'mo'a alino ano'vai-tegeno anutela fulagenamo'a maleno kagi-mainegeno augosamo'a yagemo'ma hia kava huno aivasa nehigeno tole aiyamo'a ata anefe'mo nehia tunage yosa kana nehigeno emaine. ² Ege'na agogeno nagola osi avona ayapi hanegeno tamaga aiyamo'a hagelimo agupile ayegeno haoga aiyamo'a mopafi ayegeno huteno aye hala hale humane. ³ Humaineno agema aiyana laiyoni afumo'ma vale vale nehia avamete huno keha keha nehigeno seveni'a (7) akali kalu ko nelino tusiya huno monagemo'a humane. ⁴ Seveni'a (7) akali kaluma hia kea havite'na avopi ago kaegahe huanagi ikapinagati nago kea

falote huno mage huno hige¹na havue “Seveni¹a (7) akali kaluma hia kea avopina okaeka falakilio.” huno hige¹na havue.

⁵ Havugeno timo agupile¹ene mopafi¹enema aiya aye hala halema hu-mainege¹na agoa ensole kanomo¹a tamaga ayana ikate alisaga hie. ⁶⁻⁷ Huteno mage hie “Haimu¹ene kanogino Anumaya Koti¹a muki¹a kanafina maige maige huno ika¹ene ikapinaga hanea ya¹ene mopaene mopafima hanea ya¹ene hageli¹ene hagelipima hanea ya¹yagaene talo hu-malenea kanomo agile tamage nehue. Anumaya Koti¹a nago¹ene agava omaigahigi seveni (7) molia ensole kanomo¹a agai¹a ufena hugahe nehinageno Anumaya Koti¹a nayoma falakino hanea kea, agai¹a ali¹yama alimainaya amaune vaya¹ma hamapai-mainea kemo¹a falote huno tamage hugahie.” huno hie.

⁸ Hige¹na hagoteno ikapinagati¹ma hige¹na havua kemo¹a eteno nago¹ene mage huno hie “Hagelimo agupile¹ene mopafi¹ene aiyama aye hala hale huno heti-maiya ensole kanomo ayapima hanea ali vakaye-linea avona kagaya molio.” huno hie. ⁹ Hige¹na ani ensole kanomote vua¹amo¹na mage hu¹na hue “Kagaya ani osi avo omana namio.” hu¹na hugeno mage huno nahapaiye “Kagaya alika no. Nesanana kavayafina tumemo timo¹ma hia kava huno haga¹age hugahianagi nakaisanana kaipafinaga atu¹age hugahie.” huno hie. ¹⁰ Hige¹na ani osi avona ensole kanomo ayapiti ali¹na nogeno navayafinaga tumemo timo¹ma hia avamete

huno haga'age hianagi ne'nama nakauvana naipafinaga atu'age humaine.

¹¹ Hige'ya Yoninia mage hu'ya nahapaiye “Kagaya nago'ene alu amaugafa kalimai vea'nene, alu kote kote mainaya vea'nene, alu make lu make ne'aiya vea'nene ala sauve vea'nenefena kaune kea laga huka hamapaigane.” huno nahapaiye.

11

Tole kanolatamo-gania Anumayamo kea huhale'ana hu-maina'e.

¹ Nago kanomo'a male'na agege gege hisua ayopa kana ka'yona namiteno mage hie “Kagaya hetika Anumaya Koti mono no'ene* kae salamana nehaya folamole'ene mo maleka agege gege huka hapalika ago. Ani nopina Anumaya Koti agima alisaga nehaya veala hapalika ago. ² Hapaligananagi malagama hanea mopa* maleka agege gege huka ohapalio. Ani kaiyaga Anumaya Koti kema nohavisaya vea'mogami amamineanagi'ya tagufa (3) kafuene sikisi'a (6) ika'ene ani vea'mo'ya Anumaya Koti kumala alu aotage kuma meli haviya hugahae. ³ Nehisage'na nagaya tolea nagai kema huhale'ana hisa'a kanolatana tokiya'nia anamisuge'ana kayavo kena fai-line'ana tagufa (3) kafuene sikisi'a (6) ika'ene nagai kea huhale'ana huga'e.” huno hie.

⁴ Ani lole kanolatana ma mopafi kava humainea Anumayamo aule heti-maina'ana tole olivi yosa kana hute'ana tole ka'ni

kana humaina'e. ⁵ Nago'a vea'mo'ya ani kanolatana ali haviya hugahema hisageno'a ani kanolatamogani anavayafitila atamo aikalu huno kame vea'ania temasagalisige'ya faligahae. E, anakai'ma ali haviya hunatesaya vea'mo'ya faligahae. ⁶ Ani lole kanolatamogania tokiya'anileti "Kola o'aiyo." hu'ana hisa'ageno kema huhale'ana hisa'a kanafina kola o'aigahie. Tifema "Kolama'age huo." hu'ana hisa'ageno'a ani'a hugahie. Anakesama havisa'a kanafina "Tusi'a kana ya'ene kaliene falote huo." hu'ana hisa'ageno'a ma mopafi veala nago'ene nago'ene hu'ana hamaega'e.

⁷ Hamaega'anagi Anumaya Koti'ma anaminea kea hu ha'no hutesa'ageno kefo afai afumo'a ayola omaleno afepinaga tavi-mainea komufinagati ehaino me hanaesige'ana faliga'e. ⁸ Falisa'ageno anaugafamo'a ala kuma'mo kate'ma, Anumaya'animona Yisasina yafaga yosale'ma hae'ya asai-malenaya kuma'mo, yegegate malegahae. Avame kefima hu-male'ya nehaya ala kuma'mo agia Sotomuene Isipienene hu'ya nehae. ⁹ Falisa'a anaugafa yegegate tagufa (3) kanaene ani kanamo yagemo'a amu'note ene'vige'ya nago'a vea'nea alu kote kote vea'nene, alu make lu make ne'aiya vea'nene, alu maugafa lu maugafa kalimai vea'neyagaene, ani kanolatamo-gani anaugafa ageme-geme vayanagi nago'a vea'mo'ya ali'ya hevainategahe hayanagi ani vea'mo'ya "A'ao." hu'ya hage'ya ali'ya hevai o'anatenae. ¹⁰ Hevai o'anatenagi ani

kanolatamogania muki'a kotega vea'ma tusiya hu'ana ali haviyama hu ne'amata'a kanolatama fali'a yafenagi'ya tusiya hu'ya musena nehu'ya muse yana amafalu'amimo-gamina momami memami hugahae. ¹¹ Hugahagi tagufa (3) kanaene ani kanamo yagemo'a amu'note evia kanamo'a ha'no hutegeni Anumaya Koti'a ani kanolatamo-gani anaugafafi hanaimula huvainatege'ana ani kanolatana ete'ana hetil'age'ya muki'a vea'mo'ya ani yana agageno amama'yoa aige'ya kolia humainae. ¹² Koli nehu'ya haviyana ikapinagati ala kegefafiti ani kanolatafena mage huno hie "Tanakaya ehaitana e'o." huno hige'ya kame vea'animo'ya age-mainage'ana siapi hai-fale'ana ikapinaga hai-maina'e. ¹³ Hai-maina'a anayufina tusi'a imila aliteno ani ala kumakefa teni'afi (10) ali fako hu-malageno anifiti ani imi'mo'a nago kaiyaga ali haviya higeno seveni tauseni'a vea'ne (7,000) hamaege'ya fali ha'no humaine. Na'a hu-mainayafe ofali'yama afa'a mainaya vea'mo'ya tusi'a koli hute'ya ikapinagama mainea Anumaya Koti agia alisaga humainae.

¹⁴ Tole kana yana ago ha'no hianagi avo'nio nago'ke kana yana aupa kanafi falote hugahe hige'na nahau hu nelamatoe.

Seveni (7) molia ensole kanomo'a ufena humaine.

¹⁵ Anile seveni (7) molia ensole kanomo'a agai'a ufena hige'na havugenon ikapinagati nago'a vea'mo'ya ala kegefafiti mage hu'ya

humainae “Anumaya Koti'ene taugafama aligatisiafene huno hutenea kanoene ma mopafi kava vea'mogamina ago amakasa'age'ya anaiyafinaga mainayanagino Anumaya Koti'a agola maige maige huno kava yagaigahie.” hu'ya humainae. ¹⁶ Anile Anumaya Koti aule hanea siale'ma mainaya vayala tueti fo'a (24) kava vaya'mo'ya mopafi asaga hu-lavi'ya amako'ya ye-maine'ya Anumaya Koti agia alisaga hu'ya mage hae

¹⁷ “Vae Anumaya Kotigae tusi'a tokiyaka'a haneanagika nayona mainananagika menia mainananagika tusi'a tokiyakaleti aepa heka muki'a yatela kava ne'yagaina yafe tagaya kagaifena tusi'a museka'a nehune. ¹⁸ Kagai kema nohavia vea'mo'ya kagaifena amaipa kafa henegatayafe kagaya kaipa kafa hemateka muki'a fali-mainaya vea'nema kaiyeke humateka kefo ya'amimo anona'amia amamisana kanamo'a ago falote humaine. Ani kanafina kagai kema havi'ya amakupi malenaya vea'nene kagai amaune vea'nene muki'a kagai kagima alisaga hu'ya kaiyafinagama nemaiya vea'nene ala amakima hanea vea'nene osi amakima hanea vea'nene kanale anona ya'amia amamigane. Amamiteka nago'a vea'mo'ya ma mopafi vea'mogamima ali haviya hune'amataya vea'mogamina kefo ya'amimo anona'amia kagaya ali haviya

humategane.” hu'ya humainae.

¹⁹ Hageno Anumaya Koti nona ikapinaga hanea mono nona yaki-talageno Anumaya Koti'ma alino hagelafimatenea kema hanea pokisia ani mono nopina fufu yate hanege'ya ne'agageno anile ala agegefa ne'aigeno monagemo'a tusiya nehigeno imila ne'aligeno ko'mopamo'a talagufe-lavino aimaine.

12

Yoni'a nago a'ene ala osifa'vene age-maine.

¹ Nagola tusi'a tokiya'age avame yana ikapinaga falote hie. Nago a'mo'a mainegenon kena'amo'a yege aumona ayeno au'vai-maigeno ikamo'a aiyafinaga hanegenon anutela tuelufu'a (12) ka'nefimo'ya tumano ku kana huno vai-line. ² Ani a'mo'a aipaene mainenon inamu ya alitegenon agata aigenon avovo humaine.

³ Nehigenon nagola tokiya'age avame yana ikapinaga falote hie. Nagola tusi'a haesa osifa've mainegenon seveni'a (7) anuna hanegenon teni'a (10) ave'yaga anu'yagafina hanegenon seveni'a (7) ala sauve kanomon tumano ku'yaga ani avetela vai-line. ⁴ Ani osifa'vemo'a ikate'ma hanea ka'nefi'yaga tagufafi (3) ali fako hu-malagenon anifiti nago haupa kaiyaga ka'nefi'yaga aigo'yaleti aye tafai-talegenon mopafi elavi-mainegenon ani osifa'vemo'a a'mo aule hetino nafa'ne'ama ne'atesiana ani havi osifa'vemo'a haeno nesifafene huno agava maine. ⁵ Mainegenon ani a'mo'a ne nafa'nema ne'ateana ani nafanemo'a

haenaga ala kano maiteno aeni ayopa'a alineno muki'a ma mopafi veate tokiya'age huno kava yagaisia nafa'nema ne'ateana ani nafa'nea aupa'a hafale'ya avalesaga hu'ya anafinaga Anumaya Koti siale atena. ⁶ Atageno ani a'mo'a nafa'nema ateteno'a faleno vigeno Anumaya Koti'a maisia kumala talo tala hutegenoko ka'me kotega via'amo tagufa (3) kafuene sikisi'a (6) ika'ene Anumaya Koti'a yagaitene.

⁷ Na'a higeno ikatela tusi'a tua falote humaine. Ensolemo-gami kava kano'amimo agia Maikoloe ensole vaya'yagaene tokae'ya havi osifa'vene agai'a Kefo Avamu'yagaene tusi'a tua humainae. ⁸ Tuma hayanagi havi osifa'vemo tokiya'a omalege'ya asaga hu-mainage'ya avale'ya ikapinagati avale'ya haga'yu hu-talegeno nago'ene anile omaigahie. ⁹ Ani nayoma nemaiya ala osifa'vemo agia Satani'e nehaya kanomo'a ma mopafi veafena havigege'ya huno ayemavataga hugeno omai kanoene agai'a avamu'yagaene ikapinagatila amavale'ya haga'yu humatalage'ya ma mopafina elavi-mainae.

¹⁰ Elavi-mainage'na havugenoko ikapinaga ala kegefafiti mage huno hie "Anima avale'ya haga'yu hu-talaya kanomo'a tafu-tagana-gamina muki'a kanafina humatege humatege huno mage hie 'Ani kefo yana nehae.' huno Anumaya Koti aufima hufalote nehia kanomona ikapinagatila ago avale'ya haga'yu hu-talenaya yafe Anumayatimo'a tagu tamema aligatisia yamo'a ago falote humaine. Anumaya Koti'a

agai'a tokiya'a muki'a vea'nea ago amave-
 liteno agaya ala sauve kava kano maine.
 Maineanagino agai'a tamaugafa aligatisiafene
 huno hutenea kanomo kava yagaisia tokiya'a
 hane. ¹¹ Haneanagino Satani'a tafu-tagana-
 gamifena 'Na'a kefo yana nehae.' huno ali
 falotela hianagi tafu-tagana'ya Yisasi'a, Sipi
 sipi nafa'nemo kolamo'ma tavi-mainea kene
 Anumaya Koti kemo'ene huhale'ya humainaya
 yateti Satanina agase-mainayanagi amakai'ami
 amaugafahena amakesa ohavi'ya falisaya yafe
 kolia nohae. ¹² Na'a humainaya yafe ikamogaene
 ikapinaga mainaya vea'nene musena hiho.
 Musena hugahayanagi Satanina ikapinagatila
 avale'ya haga'yu hu-talageno ma mopafina
 elavi-mainegeno 'Aupa kana kano'a maigahue.'
 huno agesa havimainea yafenagino aipamo'a
 ata neleanagi'na avo'nio ma mopafi'ene
 hagelipi'ene mainaya ya'yagahena nahau hugi
 ka'yeho."

¹³ Ala osifa'vea ago avaleno haga'yu hu-
 talegeno ma mopafi elavino'ma emainea yana
 ageteno ani ne nafa'nema atenea a'mona ali
 haviya hutesia yafe mo nati-maine. ¹⁴ Mo
 natianagi Anumaya Koti'a ani a'mona aluga
 aluga haopalega ala hakikimo ageko'na talo
 huno ategeni ani a'mo'a haleno ka'me kotega,
 Anumaya Koti'a talo tala humalenea kumate
 umainegeni Anumaya Koti'a tagufa (3) kafuene
 sikisi'a (6) ika'ene yagai-mainegeni ani havi
 osifa'vemo'a ali haviya hutesia tokiya'a oma-

lene. ¹⁵ Omaleneno ani osifa'vemo'a avayafitila muvali-talegeno tavia timo'a tusi'a ti hogino aiyayeno lavia'amo ani a'mona asaga huno nakaino ali haviya hisie huno ani kavala humaine. ¹⁶ Na'a hianagi ani a'mona aya hisia yafe mopamo'a eko alino avaya aka humainegenoni osifa'vemo avayafiti'ma lavia timo'a ani eko kapi tavi fale ha'no humaine. ¹⁷ Tavi ha'no hianagi ani osifa'vemo'a a'mofena aipa kafa heteteno ani a'mo aginagomo'yaene tua hugahe umaine. Ani vea'mo'ya Anumaya Kotikahegi kema havi'ya akave'ma nemale'ya Yisasi humainea kema atafa hu-linaya vea'nene tua hugahe umaine. ¹⁸ Ani osifa'vemo'a hagelimo agegayalega hetino maine.

13

Tole kefo afai afulatana va'yi humaina'e.

¹ Osifa'vemo'a hagelimo agegayalega hetino mainege'na nagaya Yoni'na agogeno nagola kefo afai afua hage lipiti va'yi hige'na age-mainoe. Ani kefo afai afumo anumo'a seveni'a (7) anu'yaga hanegenoni'teni'a (10) ave'yagamo anupitila hai-mainegenoni ave'yagamotela ala sauve kanomo tumano ku'yaga teni'a (10) tumano ku vailine. Ani seveni'a (7) anutela kefo afai afumo agia hanegenoni agiyagamo'a Anumaya Kotifena kamuge hatage'ya vaite'ya hahaviya hutaya agiyaga kae-malageno hane. ² Ani kefo afai afumona agoana ma'a humaine. Nagola afai pusimo agia lepatie nehaya afu kana huno

aiyamo'a nago ala afai kalamo agi'a peamo aiya kana humaine. Avayamo'a laiyni afumo avaya kana hu-mainege'na age-mainoe. Agogeno ani ala osifa'vemo'a agai'a tokiya'aene ala kava hisia sia'aene ani kefo afai afumona amine. ³ Amigeno ani kefo afai afumona nago anuna ago hae-malenaya falitesea afugula haneanagi amuna ageno ago eteno kanale hutene. Kanale hutege'ya agete'ya muki'a ma mopafi vea'mo'ya agete'ya amama'yo aige'ya ani kefo afai afumona akave umainae. ⁴ Ala osifa'vemo'a agai'a tokiya kefo afai afumona aminea yafe muki'a vea'mo'ya ani kefo afai afumofena “Alati maine.” hu'ya agia alisaga humainae. Kefo afai afumo agiene alisaga nehu'ya mage hu'ya hae “Hana kanomo'a kefo afai afumo tokiya'amo'ma hia kavala huno hugahie? Ta agai'enema tuma hisia tokiya'a hane?” hu'ya hae.

⁵ Hageno Anumaya Koti'a mage huno hie “Atalegeno tagufa (3) kafuene sikisi'a (6) ika'ene kava yagaino.” huno higeno ani kefo afai afumo'a agai'a agia alisaga huno Anumaya Kotifena tusiya huno kamugea hatageno vaitene. ⁶ Ani kefo afai afumo'a avaya aka-naka huno Anumaya Kotina kamugea hu ne'ateno Anumaya Koti agiene nemaiya kuma'aene ikapinagama mainaya vea'aenena hu-haviya humatene. ⁷ Hu ne'amategeno Anumaya Koti'a atalegeno Yisasina amaku'a aminaya vea'nene tua huno amakaseteno muki'a alu kote alu kote vea'nene, alu make lu make ne'aiya vea'nene, alu

maugafa lu maugafa kalimai vea'nene, kava humatesia tokiya amigeno kava yagaino maine.

⁸ Kava yagai-maineanagi'ya muki'a ma mopafi vea'mo'yama agia alisaga hugahayanagi maige maige hisaya hamaimu'ma hanea vea'mogami amakima hanea avopi amaki kae-malenea vea'mo'ya agia alisaga ohugahae. Ani avona Anumaya Koti'a ma mopama taloma ohunea kanafina mage huno hu-maineanee “Nagai Sipi sipi nafa'nea, Yisasi'a, faligahie.” huno hutenea kanomo avone.

⁹ Nagi tamakesama hanesimo-gatama mani kea havilama hutama hiho. ¹⁰ Anumaya Koti'a “E.” huno hisige'ya nago'a vea'mo'ya kina nopina ugahae Anumaya Koti'a “Naepe ka'yoteti haetama falimato.” huno hisige'ya nago'a vea'mo'ya naepeleti falilamategahae. Ani au'ava yamo'ma falote hisigetama Anumaya Koti kea havi'ya amakupi'ma malenaya vea'mogatama tokiya waitama mani kea ali lokiya waitama atafa hu-litama maiho.

¹¹ Nagaya Yoni'na agogeno nago kefo afai afumo'a* mopamo agusafiti eva'yi humaine. Ani kefo afai afumo anupina tole avela, sipi sipi nafa'nemo ave kana ave haneanagi agema aiyana tusi'a puku pukumo age kana huno agea aimaine. ¹² Ne'aigeno hagote kefo afai afumo'a tokiya'a amigeno ani himamuleti muki'a ma mopafi vea'mogamitela kava humaineno anima nago kefo afai afumo'a muki'a ma mopafi mainaya vea'mogamifena mage huno hie “Hagote kefo afai afumona anupina hae'ya

falitesaya kava hageno amuna ale-maineanagino eteno kanale hutenea afumo agia alisaga hiho.” huno humaine. ¹³ Nehuno anima nago kefo afai afumo'a muki'a alu'a augafa tokiya'age avame yana nehuno atamofena “Ikapinagati elavio.” huno'ma hiana vea'mo'ya ne'agageno atamo'a ikapinagati mopafina elavi-maine. ¹⁴ Elavigeno hagote kefo afai afumo'a “Na'a huo.” huno tokiya amigeno nago afai afumo'a tokiya avame yama nehia yateti veala aye mavataga hia'amo ani veafena mage huno humaine “Tamakaya hagote kefo afai afua, naepeleti honomu ayageno faliteno eteno mainea afumo agia alisaga hisaya yafe yosaleti avame'name hutama amena talo hiho.” huno humaine. ¹⁵ Hige'ya taloma hayana Anumaya Koti'a atalege'ya nago kefo afai afumo amena yosaleti talo humalaya kefo afai afumo amela haimula amigeno aepa heno nago'a vea'mo'ya agai agima alisaga nohageno haege'ya fali-maine. ¹⁶ Ani kefo afai afumo'a mage huno hie “Muki'a vea'mogamina, amakima omale vea'nene, amakima hanea vea'nene, miya'ami hanea vea'nene, miya'amima omale vea'nene, nofipi maine'ya miya o'ali ali'ya ne'aliya vea'nene, amakai'ami miya alisaya ali'yama ne'aliya vea'nene tamaga amayatelo hamanilelo ohananesia avona kaemateho.” huno hige'ya kasago'ya vea'mo-gamina ani avomo'a hamanileti kae-male kae-male humaine. ¹⁷ Hige'ya ani avona hagote kefo afai afumo agio ifi ani agimo napamao amaugafale'ma ani alegana yama omalenesaya vea'mo'ya nago

yana alu vea'neletila miya ohige'ya amakai'ami
yana alu vea'mo'ya miya ohugahae.

¹⁸ Nago'a vea'ma kanale havi havi'ya'ami
hanea vea'mo'ya ani hagote kefo afai afumo
napama'a hapali'ya havilama hisae. Ani napana
nago kanomo agimo napama'a hane. Ani ag-
imo napana sikisi hataleti sikisiti sikisi'a (666)
napama'a hane.

14

*Kasago'ya Sipi sipi nafa'nemo vea'mo'ya hae-
gafa yagame humainae.*

¹ Nagaya Yoni'na agogeno Anumaya Koti
Sipi sipi nafa'nea Saiyoni* ago'yale hetino
mainege'ya kasago'ya vea'mo'ya vani hataleti
foti fo tauseni'a (144,000) vea'mo'ya agai'enena
ani ago'yale heti'ya mainae. Ani vea'mogami
hamanilela Sipi sipi nafa'nemo agiene agai'a
Nefa agiene kae-malenae. ² Nagaya ikapinagati
kanale age aiya agea havugeno ti anamo'ma
asaga hu-lavino nelavino agema ne'aiya
kava huno ne'aino monagemo'ma hia kava
hige'na havimainogeno kasago'ya vea'mo'ya
gitama ne'aigeno agema ne'aiya kava hige'na
havimainoe. ³ Havuge'ya ani vea'mo'ya
Anumaya Koti'ma mainea siamo aule'ene fo'a (4)
hamaimu'ene anaga'mo-gami amaule'ene kava
vaya'mo-gami amaule'ene heti'ya maine'ya
haya yagamea nago'a vea'mo'ya ohavinaya
yagamea, haegafa yagame humainae. Ani
yagame haya vea'nea ma mopafi mainageno

Anumaya Koti'a amaku amamema aligati-mainea veala vani hataleti foti fo tauseni'a (144,000) vea'mo'ya amakai'amige ani yagame havimainae. ⁴ Ani vea'mo'ya a'nea amavayu hu'ya ofaeyageno amaku'amo'a oni'ya'agela ohigeno Sipi sipi nafa'nemo'a vai ne'yage'ya ani vea'amo'ya akavela vai ne'ayaye. Anumaya Koti Sipi sipi nafa'nemo'a faliteno kefo ya'amimo aigagimatenea yapiti miya humateteno ma mopafi vea'mogami amu'nopiti hageteno amaugafa aligati-mainegeno Anumaya Kotite'ene Sipi sipi nafa'nemote'ene amavaleno amate-maineane. ⁵ Amatege'ya ani vea'mo'ya havige ohu vealagi'ya nago'a kefo'amia omaleneane.

Tagufa (3) ensole vaya'mo'ya kanale kea huhale'ya humainae.

⁶ Nagaya agoana nago ensole kanomo'a ika'mo amu'note haleno vai ne'ayeno agola hanege hanege huno nehanea kanale mono kea alino muki'a ma mopafi mainaya vea'mogamina alu kote alu kote vea'nene, alu make lu make ne'aiya vea'nene, alu maugafa lu maugafa kalimainea vea'nene hamapaisia yafe vai ne'aye. ⁷ Vaiyeno ala kegefafiti mage huno hie "Anumaya Koti'a vea'mogami alino kaiyekema humate-sia kanamo'a ago falote hu-mainegi tamakaya koli nehutama Anumaya Koti agia alisaga hiho. Anumaya Koti'a ika'ene mopaene hageli'ene

mopafiti¹ma kapai nehagea ti¹ene agai¹a talo humalegetama agai agia alisaga hiho.” huno humaine.

⁸ Hume hume ne¹vigeno akavelega nago ensole kanomo¹a ne¹eno mage huno humaine “Ala kumala Papiloni* kumala tusiya hu¹ya ago ali¹ya tagape aitalae. Papiloni vea¹mo¹ya muki¹a kotega veafena mage hu¹ya humainae “Tagayama huna kava hutama kumai yana haga¹age huno havili kana humainegi afa¹a neho.’ hu¹ya hage¹ya ani kumai yana mai¹ya humainae.”

⁹⁻¹⁰ Ani lole ensole kanola¹mogani anakavela nago ensole kanomo¹a ne¹eno ala kegefafiti mage huno hie “Nago¹a vea¹mo¹ya kefo afai afuene amayateti avave-name hu¹ya talo humalenaya ame¹ene¹ma agima alisagama nehu¹ya ‘Ani kanomo agia nayatelo nahanilelo agia aiga¹maelato.’ hu¹yama humainaya vea¹mogamina Anumaya Koti¹a haima ne¹vaiya yana aligahae. Anumaya Koti aipamo¹a haviya hinageno hai vaimateno ata nelenageno atu¹age huno havili kana higeno takino amamisige¹ya ani vea¹mo¹ya ani havilina negahae. Nesayana alu aotage ensole vea¹mogami amaule¹ene Sipi sipi nafa¹nemo aule¹ene hi¹mana¹age ata nelea yafa¹yaga hanea atafi mainesageno amaleno asagalisige¹ya tusiya hu¹ya amakata aigahie. ¹¹ Muki¹a kanafina ani amakatama aige aige hisia atamo halinamo¹a taga ohugahianagino agola haige haige huno haigahie. Haige¹ya ani vea¹mo¹ya kefo afai afule¹ene amayateti avame-

name hu'ya talo hu-malenaya amema'aene agia alisaga nehu'yama ani kanomo agima amaugafale hanesia vea'mo'ya muki'a kanafina agola kege'ene felugaene amaugafa amakata aige aige hinage'ya ha'no ohugahie.” huno humaine.

¹² Havisayana tamakaya Yisasina tamaku'ama aminaya vea'mogatama Yisasife havitama tamakupi malenaya kea atafa hu-linetama Anumaya Koti kahegi kema akave maletama mailokiya vaitama maiho.

¹³ Nagaya Yoni'na ikapinagati nago kea havugeno mage huno hie “Kagaya kea ma'a huka kao muki'a Anumayamo'ene ailokae'ya nemaiya vea'mo'ya menima aepa he'ya falisaya vea'mo'ya tusi'a muse hugahae.” huno humaine. Higeno Alu Aotage Avamu'mo'a mage hie “E, ali'ya ali-mainaya yana ne'atale'ya maifalu hisage'ya kanale kava'ma hu-mainaya yamo'a amakai'ene ugahae.” huno humaine.

Anumaya Koti'a ma mopafima afule-mainea kave'ma hataka hisia kanamo'a ago falote humaine.

¹⁴ Nagaya agogeno nago efe'age siatela nago vemo'a ikapinagati emainea kanoa vaya'mo atenea kano avamete hia kanoa siate maineno anute kava vaya'mogami tumano kula, kanileta yafateti talo humale tumano kula vaiteno ayapina ave'ne'ne huno fagagi-mainea naepe ka'yona ali-line. ¹⁵ Ali-linegeno nago ensole kanomo'a Anumaya Koti nopiti hati-lavino ne'eno ani siate'ma maiya kanohena ala

kegefafiti mage huno hapaiye “Muki'a ma mopafi kave'mo'a afule-mainegeni ani kave alisuna kana haneanagika kagayama ali-linana naepe fagagi humainea naepe ka'yotetila nesate'ma humainea kavela alio.” huno hie. ¹⁶ Higeno siate'ma maiya kanomo'a fagagi-mainea naepe ka'yotetila muki'a ma mopafima afule-mainea kavela hataga humaine.

¹⁷ Nehigeno nago ensole kanomo'a ikapinaga hanea mono nopiti hati-lavino elavia'amo agai'enena ani'a huno tusi'a ka'yona fagagino ave'ne'ne huno naepe ka'yona ali-lino emaine.

¹⁸ Ne'egeni nago ensole kanoa atale'ma kava nehia kanogino afuma he'ya negaeyaya folamole maineleti ne'ataleno emaine. Ea'amo fagagino ave'ne'nea naepe ka'yoma ali-lia kanomofena ala kegefafiti mage huno hie “Muki'a mopafi nofi alagayagamo'a ago afule-mainefe kagaya ani naepe ka'yoka'a alika ani nofi alagayaga mo hataga huka hala'ya huo.” huno humaine.

¹⁹ Higeni ani ensole kanomo'a naepe ka'yoma'a ali-lino ape huno muki'a mopafima hanea nofi alagayaga hataga huno helafi-lino via'amo vea'mo'ya amaiyaleti'ma aye lata-pageno tima'amo'ma nelavia yafa yopa, Anumaya Koti'a kefo yafena tusiya huno aipa kafa huteno kefo yama nehaya vea'mogamina anona'amima amamisia ala yafa yopafi mo malene. ²⁰ Mo malegeni ala kuma'mona malaga ani nofi alagama aye lata-pegeni'a anima aye latapea kolamo'a tusiya huno lavino lavino lavia'amo

timo'a hogino vea'mogami amayo'nale'ma nehैया avamete huno hogino aya'aya kotega tali hataleti (300) kilomita tavige'na age-mainoe.

15

Seveni'a (7) ensole vaya'mo'ya seveni'a (7) havi yatafa atafa hulinae.

¹ Nagaya Yoni'na nagola tusi'a tokiya'age alegana avame yana ikapinaga falote hige'na agoana ma'a humaine. Seveni'a (7) ensole vaya'mo'ya anile maine'ya seveni'a (7) havi yatafana vea'mogami haenagalafa falote hisia ali haviya humatesia yana atafa hulinae. Anima ali haviya humatesia yana ha'no hisigeno Anumaya Kotina aipamo'ma ata nelea yana agola ha'no hugahie.

² Nagaya agoana nagola hageli kotuna galasi kana huno alave alave nehigeno amu'no'afina ata nelege'na age-mainoe. Ani kotute muki'a vea'mo'ya “Kefo afai afuene amayateti talo hu-malenaya amefe'enena agia alisaga ohugahunagi. Agiene napama'aene taugafalega okaegahae.” hu'yama ani afumona agase-mainaya vea'mo'ya ani hagelimo agegayale heti-maine'ya Anumaya Koti'ma amaminea yave'ya atafa hu-line'ya yagamea humainae.

³ Ani vea'mo'ya Mosese'a Anumaya Koti ali'ya kanomo yagamene Sipi sipi nafa'nemo yagamene hu'ya ma'a humainae

“Ala Anumaya Kotigae tusi'a tokiyaka'a haneanagika muki'a humainana yamo'a

kanale¹ya huka talo hanageta tagaya ne¹agonageno tama¹yoa ne¹aiye. Muki¹a mopafi vea¹mogamina ala sauve kano¹ami maineka kava ne¹yagaika kagaika¹a au¹ava yakamo¹a tamagelafa huno fatago humaine. ⁴ Ala kanomogae kagaika¹age nagoke¹moga kefo yana ohuka alu aotage kanoma mainana yafena hana kanomo kagaifena kolika¹a ohugahie? Hana kanomo kagai kagia alisaga ohugahie? Muki¹a mopafi vea¹mo¹ya kagaya fatago huka mainana au¹ava yaka¹a ago age-mainaya yafe kagaitega ea¹amo¹ya kagia alisaga hugahae.” hu¹ya yagamefitila humainae.

⁵ Yageamea nehage¹na ikapinaga ete¹na agoana mono nopina, kelamagama ali falote nehia nona, alu aotage seli nona yaki-mainege¹na age-mainoe. ⁶ Ne¹agoge¹ya seveni¹a (7) ensole vea¹mo¹ya seveni¹a (7) ya¹yaga vea¹ma ali haviya humatesaya yama atafa hu-linaya ensole vaya¹mo¹ya mono nopitila hati-lavi¹ya kumatega emainae. Ani vea¹mo¹ya oni¹ya ohu kenamo¹a alave alave huno efe¹age humainea kena fai-line¹ya kanileta yafateti talo humale nofila amaifi¹yafale ayegalaki-line¹ya emainae. ⁷ Ageno fo¹a (4) hamaimu¹ene anaga¹mogami amu¹nopitila nago kanomo¹a ea¹amo seveni¹a (7) yopa kanileta yafateti talo humale yopayaga ali-lino amamine. Ani yopayagafina Anumaya Koti¹a maige maige huno mainea kanomona

haima vaigeno aipamo'a atama nelea yana ani yopafina havate-maine. Havate-mainegen alino seveni'a (7) ensole veala ani yopayaga me mamine. ⁸ Me mamige'ya Anumaya Kotina tokiya hale yama'aene himamu'aene halina kana huno ani mono nopina havate-maine. Havate-maineanagi'ya nago'a vea'mo'ya ani nopinaga hai'ya ofalena. Ofalenayanagi'ya seveni'a (7) ensole vea'mo'ya anima seveni'a (7) ali haviya humatesaya ali'ya'amia ali ha'no hutesage'ya vea'mo'ya ete'ya ani nopinaga hai-falegahae.

16

Anumayamona haima ne'vaiya yana seveni'a (7) yopafiti ali'ya aihelafi-talene.

¹ Na'a hige'na havuana ikapinaga hanea mono nopiti nagola tusi'a agegefa aige'na havugeno seveni'a (7) ensole vayafe mage huno hie “Tamakaya Anumaya Kotina haima vaigeno aipamo'a atama nelea yana seveni'a (7) yopafi hanegi alitama mopafi mo aitagu-feho.” huno hie.

² Higeno hagote molia ensole kanomo'a via'amo ani yopa'afima hanea yana alino mopafi mo aitagu-fege'ya kefo afai afumo avoma amaugafale'ma kae-malenea vea'mo'ya ani kefo afai afumo amefena “Anumayati mainane.” hu'ya agima alisaga nehaya vea'mogamina tusi'a kele amamu amale-maine.

³ Amamuna amalege'ya mainageno anile molia ensole kanomo'a yopa'afima hanea yana alino hagelipi mo laki-talegeno ani hagelimo'a falimainaya vea'mogami kolamo'ma hia kava huteno muki'a tipima mainaya kafayaga fali'ya faluti-mainae.

⁴ Falutigeno anile tagufa (3) molia ensole kanomo'a yopa'afima hanea yana ala tima nelavia tipi'ene kapai'ma nehagea tipi'ene taki-talegeno ani li'yagamo'a kolama'age ti hapae-mainae. ⁵ Na'a hige'na havugeno tite'ma kava yagai-mainea ensole kanomo'a mage huno hie “Anumaya Kotiga nayona mainananagika menia ani'a huka maineka kefo yana nohana Alu aotage kanogika kaiyekema humateka kefo yamo anona'ama hu-matana yana fatago huka nehane. ⁶ Ani vea'mo'ya kagaika'a alu aotage vea'nene amaune vea'nekaene hamayage'ya fali-mainae. Faligeno ani vea'mogami kolamo'ma takilavi-mainea yafe kagaya ani kefo ya'amimo anona'amia ne'amaminanagi'ya ani kola tima nesayana kagaya kanale kava hu ne'matane.” huno humaine. ⁷ Hige'na havugeno afuma he'ya kae salamanama hu ne'ataya folamoleti nago kemo'a falote huno mage hie “E, tamage muki'a tokiyaka'a hanea Anumaya Kotiga kaiyekea fatago hulama huka hu ne'amatana kano mainane.” huno humaine.

⁸ Hige'na agogeno anile fo (4) molia ensole kanomo'a yopa'afitila yagefi ailaki-talegeno Anumaya Koti'a atalegeno yagemo'a tusi'a

amuko'age huteno muki'a veala teno amasagali-
maine. ⁹ Amasagalige'yagi vea'ma kefo yamo
anona'amima amamisia tokiya'ama hanea
Anumaya Koti agia aye haviya nehayanagi'ya
amaku'a aiyahae hu'ya Anumayamo agia alisaga
ohunae.

¹⁰ Ohageno faefu (5) molia ensole kanomo'a
yopa'afima hanea yana kefo afai afumo
siale taki-talegeno muki'a ani kefo afai
afumo'ma kava humatenea kaiyaga tusi'a
hani kige'ya agai vea'mo'ya amaugafa
amakatama aiya yafe amakai'ami amavefu'nafi
hataga hatago hu'ya akafula ani-mainae.

¹¹ Ne'anigeno amaugafale'enena amamuna
amaleno amakatama aiya yafena ikapinaga
mainea Anumaya Kotifena kamuge hatage'ya
vaitayanagi kefo yama humainaya yafena
amaku'a aiyahae ohunae.

¹² Aiyahae ohageno sikisi (6) molia ensole
kanomo'a yopa'afima hanea yana tusi'a lina
Yufaletisi lima nelavia tipi taki-talegeno ani
limo'a ta'neno hau huteno ala kakefa falote
humaine. Higeno yagama va'yi nehilegati ala
Sauve vaya'ma esaya kamo'a falote humaine.

¹³ Falote hige'na nagaya ne'agogeno tagufa (3)
Kefo Avamula utu kana avamula nagola os-
ifa'vemo avayafiti va'yi higeno nagola kefo
afai afumo avayafiti va'yi higeno nagola hav-
igege'yama nehia aune kanomo* avayafiti va'yi
humaine. ¹⁴ Va'yi hute'ya ani tali'a (3) Kefo
Avamu'mo'ya hai'ya maine'ya tokiya'age avame

yana nehú'ya muki'a ma mopafi Sauve vay-ate'ma vayana ani vayala amavale'ya alitalu humategahe umainae. Tusi'a tokiya'ama hanea Anumaya Koti'a ala tuma hisia kanafina Anumaya Koti'ene tuma hisaya yafe melitalu humatenae.

¹⁵ Yisasi'a mage huno humaine “Haviho ‘Omegahie.’ hutama nehaya kanafina musufa kanomo'a ne'ea avamete kava hu'na egahue. Egahuanagi ani kanafina kena'amia omalენage'ya alapa'agela maisaya veala amakayea ohisaya yafe menia nagaifema amakesa nehavi'ya amaula ofae'ya kena'amia fai-lisayana musena hugahae hu'na nehue.” huno humaine.

¹⁶ Utu kana Kefo Avamu'mo'ya muki'a kotegati ala Sauve vea'mogamina amavale'ya aya'amo'ya Yuta vea'mogami kefina Amagetoni hu'ya nehaya kumate melitalu humatene.

¹⁷ Aupa'a seveni (7) molia ensole kanomo'a yopa'afima hanea yana ikate hanea yasifi taki ne'a-talegeno ikapinagama hanea mono nopi-tila ala kegefa falote huno mage hie “Muki'a yana hai ha'no hie.” huno humaine. ¹⁸ Ani kea nehigeno aulumaya kotino ute ete higeno monagemo'a tusiya huno agea ne'aigeno tusi'a imila ali-maine. Ve'a'mo'ya ma mopafima mainaya kanafina ani'a augafa imila alige'ya o'agenayanagino muki'a imila agaseno tusi'a imikefa ali-maine. ¹⁹ Aligeno ala kumala Papilonia* ali haviya huno tagufafi (3) ali fako higeno muki'a ma mopafi ala kuma'yagaene alino

haviya humatene. Anumaya Koti'a Papilonia ala kumapi maine'ya kefo yama nehaya veafena agela okaninegi agesa havino haima ne'vaiya yamo'a aipafina ata nelegeno kefo ya'amimo anona'amia amamige'ya alimainae. ²⁰ Ala imikefa aligeno muki'a hagelimo amu'nopima hanea mopaene ago'yagaene fanane humainae. ²¹ Tusi'a ko'mopa, yafa ku kana huteno, ala alaisi ku kana huno kana'age huno ikapinagati asaga hulavi hulavi hia'amo veamogami amaugafale tavia'amo ali haviya humatege'ya Anumaya Kotifena "Otahaiya kano mainane." hu'ya kamugea hatage'ya vaitenae.

17

Tusiya huno kumaiya nehia a'mo'a kefo yama'amo anona'a ali-maine.

¹ Seveni'a (7) yopa atafa hulinaya ensole vayapiti nagoke ensole kanomo'a ea'amo nagaifena mage huno hie "Kagaya male ege'na kavelino. Ma kumai a'mo'a, timona avoyalega ala kumate mainea a'mo'a, kefo yama'amo anona'a alisia yafena nagaya kaveligahue. ² Muki'a ma mopafima mainaya Sauve vaya'mo'ya ani kumate mainaya vea'nenena tusiya hu'ya kumaiya he'ya* vai ne'ayage'ya ma mopafima mainaya vea'mo'yaenena ani kumate vea'nenena kefo yama nehaya kava hu'ya havilima ne'ya anegi-nagima nehaya kava humainae." huno hige'na havi-mainoe.

³ Nehavugeno Alu Aotage Avamu'mo'a nagaila Yoninia tokiya'a namitegeno ani ensole kanomo'a navaleno vea omai ka'me kotega mo natene. Mo natege'na nagaya nago akefa agoana haesa kefo afai afumo agupifi mainege'na age-mainoe. Ani kefo afai afumo augafalela Anumaya Kotina kamugema hatage'ya amakiya agia augafale kae-malena. Ani kefo afai afumona seveni'a (7) anu'yaga hanegeno ani anu'yagalela teni'a (10) ave'yaga hane.

⁴ Hanege'na nagaya agoana ani akefamo'a oko kenaene haesa kenaene fai-lino maine. Miyamo'a hai-mainea seveliyanene kanileta yafateti talo humale ya'ene fai-linegeno augafalela ale'ale nehigeno maiya akefa age-mainoe. Agogeno ayapina kanileta yafateti talo humale ke'ayola ali-linegeno kumai yama nehia ya'ene havigu-nagu hi'mana'age kefo yama'aene ani ke'ayopina havate-maine.

⁵ Ani a'mo hanilela agai'a agia avame kea mage hu'ya kae-malena "Papilonia ala kumate'ma muki'a kumai yama nehaya ya'ene ma mopafima kefo yama nehaya ya'enena ita'amo'e." huno kae-malene.

⁶ Kaege'nama agoana ani a'mo'a muki'a Anumaya Kotina alu aotage vea'nene, Yisasi'ma hulatenea mono kema hamanepaiya vea'nene hamaege'ya fali-mainaya vea'mogami kolana ani a'mo'a valu valu huno neteno havilima nete'ya anegi-nagima nehaya kava hige'na agete'na atali talu nehugeno nama'yoa aimaine.

⁷ Ne'aigeno ani ensole kanomo'a mage huno

hie na'a higeno kama'yoa ne'aiye? Nagaya ani a'mofe'ene agupifima mainea afua, seveni'a (7) anu'yaga hanegeno ani anu'yagalela teni'a (10) ave'yaga hanea afuenefena falakino hanea kea hu falote hu'na kahapaigahue. ⁸ Agana kefo afai afumo'a nayona maineanagino meni kanafina ago fali-maineanagino haenaga'a ayo'ma omale komufitila hetino ataleno ehaisia'amo hani yapima tegelege nehia atafina agola umaigahie. Umaigahianagi Anumaya Koti'a ma mopa taloma ohunea kanafima hanea avopina, maige maige hisaya hamaimu'ma hanea vea'mogami amakima kae-malenea avopina, ma mopafi mainaya vea'nea amakima okaenea vea'mo'ya ani kefo afai afuma agesayana atali hu'ya tusi'a amama'yo aigahie. Ani afua nayona maineanagino menia ago fali-maineanagino haenaga'a eteno eva'yi hisia afai afue. ⁹ Kanale havi havi'ya'amima hanesia vea'mo'ya mani yafena havilama hu'ya havigahae. Haviho. “Ani kefo afai afumona seveni'a (7) anumo'a seveni'a (7) ago'yale humaleno higeno ani kumai a'mo'a ani ago'yale maine. ¹⁰ Na'a higeno ani anu'yagamo'a seveni'a (7) ala sauve kava vaya mainae. Maine'ya ani sauve vayapitila faefu'a (5) ago faligeno nagoke menia mainegeno nagokela yaufa falote ohune. Haenaga eva'yima hisiana osi kana kano'a maigahie. ¹¹ Maigahianagi kefo afai afumo'a nayona maineanagino menia ago fali-mainea afugino eiti (8) molia Sauve kano maineanagino seveni (7) molia Sauve anagapi

maineanagino hani yapi visia'amo tege-lege nehia atafi agola umaigahie.

¹² Agana teni'a (10) ave'mo'a teni'a (10) Sauve vaya maine'ya menia yaufa kava ali'yana o'alinayanagi'ya kefo afai afuene tokiya'ami alite'ya ani kava ali'yana aupa kana kano'afi kava yagait'e'ya atalegahae. ¹³ Ani teni'a (10) Sauve vaya'mo'ya nagoke amaku amakesale maine'ya tokiya'amia kefo afai afumona amigahae. ¹⁴ Amite'ya ani Sauve vaya'mo'yaene kefo afai afuene ali nagopi atale'ya Sipi sipi nafa'nenema tuma hisayana Sipi sipi nafa'nemo'a, ala kava vea'mogamina kava'ami maineanagino ala Sauve vea'mogamina ala Sauve kano'ami mainea yafe ani luma hisayana amakaila amakasegahie. 'Nagaitega eho.' huno'ma huyogi-malenea vea'mo'ya muki'a kanafina efi efi hu'ya agai kema akave nemalaya vea'nene Sipi sipi nafa'nene ailokae'ya maine'ya ani luma hisayana amakasegahae." huno ani ensole kanomo'a hige'na havimainoe.

¹⁵ Havugeno mage huno nahapaiye "Agana ti'yaga, kumai a'mo'a ani ti avoyale'ma mopale mainea timo'a, veafe humaine. Kasago'ya vea'mo'ya alu kote alu kote vea'nene, alu make lu make ne'aiya vea'nene, alu maugafa lu maugafa kali-mai vea'nene elitalu hu'ya maine. ¹⁶ Anima teni'a (10) ave'yagama hanegeka agana teni'a (10) Sauve vaya'mo'yaene ani kefo afai afuene ali nagopi atale'ya ani kumai a'mona amaipa kafa hutete'ya ali haviya hutegahae.

Hute¹ya aluya hu¹ya tua hutete¹ya kena¹a augafaletila hate-talete¹ya augafa alaga¹age mainesige¹ya augafamona ame¹a nete¹ya atafi kae-talegahae. ¹⁷ E, Anumaya Koti¹a agai¹ama humainea kemo¹a tamage huno falote hisiafene huno ani amaku amakesa teni¹a (10) Sauve vaya¹mogamina amaminege¹ya nagoke amakesage¹ya havite¹ya ‘Ala kava kano maisie.’ hu¹ya ani kefo afai afumona tokiya¹amia aminae. Amigeno kavama maisia yama¹a hanesigeno Anumaya Koti¹a hamapai-mainea kemo¹ma falote huno tamagama hisia kana ani kefo afai afumo¹a ha¹no hugahie.

¹⁸ Ani akefa aganana tusi¹a ala kava yagai-mainea kumala, muki¹a Sauve vaya¹mogamina ago amakaseno hai-mainea kumafe nehie.” huno hige¹na havimainoe.

18

Papiloni kuma¹mo¹a ago haviya humaine.

¹ Ikapinagati nago ensole kanoa elavige¹na nagaya Yoni¹na agogeno ani ensole kanomo¹a tusi¹a tokiya¹a hanegeno elavino¹ma eana yagemo¹ma aivasa nehia avamete huno konagali yama¹amo¹a mopamona aivasa humaine. ² Humalegeno ani ensole kanomo¹a ala kegefafiti mage huno hie “Papilonia ala kumakefamo¹a tusiya huno ago haviya hu-mainege¹ya menia Kefo Avamu¹yagaene nago¹a fali-mai afuyaga aye laga-fe¹ya ne¹vaiya namayagaene ani kumapina ali vai-mainae. ³ Ani Papiloni vea¹mo¹ya muki¹a

kotega veafena ‘Tagayama nehuna kava hutama kumaima he au'ava yamo'a haga'age ti kana hu-mainegi neho.’ hu'ya hage'ya ani kava'ma haya yamo ani kumala agola ali haviya humaine. Muki'a ma mopafi Sauve vaya'ene ani'a hu'ya agai'ene kumai yana hu-mainayagi'ya ma mopafi miyana tusi'a miya alisaya ali'ya ne'aliya vea'mo'ya tusiya hu'ya kumai yana hu-lite'ya haya yateti ala miyakefa ali-mainaya yafe ani kumala agola ali haviya hu-talenae.” huno humaine.

⁴ Nagaya havugeno nago kemo'a ikapinagati mage huno humaine “Muki'a vea'nimogatama ani kumapitila ne'ataletama hati-lavitama malaga eviho. Havigu nagopi tamakaya afalu falu hutama mainesageno ani vea'mogami kefo ya'amimo'ene huyafenagi ailokaetama ani vea'mogami kefo yamo anona'ami aliyafenagi hati-lavitama eviho. ⁵ Ani vea'mo'yama humainaya kefo ya'amimo'a ala itugefamo'ma hia kava huno maleme maleme ikapi nehaiyanagino Anumaya Koti'a muki'a ani kumate vea'mo'yama hu-mainaya kefo yafena agesa havino maine. ⁶ Anumaya Kotigae ne'aganageno ago'ma kefo yama humainea yama'amona alika tolege'ya ali lokaeka hu-mainea avamete masufina takika amigeno neno. ⁷ Ani kumai a'mo'a agai'a augafa alino nehaino ageno ha'yema hia kava'ma hu-mainea yatetila kagaya ani'a huka augafa agata aisia ya'ene tusi'a aviteno augafahema kalagi aisia ya'ene

amio. Ani a'mo¹a agupinaga mage huno nehavie 'Nagaya ala Sauve a'nemo siale mainoanagi¹na megusa akefa omainoanagino nagaitela kana yamo¹a falote hisige¹na nagaya avia o¹ategahue.' huno agesa havimaine. ⁸ Havianagi ani kefo yama humainea yateti aupa¹a nagoke yupa anona¹a agata aisia yana falote hugahie. Ani kumate mainaya vea¹mo¹ya kasago¹ya kaliene amaka tesia ya¹ene alite¹ya falisage¹ya muki¹a vea¹mo¹ya amahau hu¹ya avi tegahae. Atamo¹a Papiloni kumala tesagali-talegahie. E, tusi¹a tokiya¹a hanea Anumaya Koti¹a havino kaiyekea humateteno anima amaugafa amakata aisia yana tusi yate amamigahie.

⁹ Muki¹a Sauve vaya¹mo¹ya ani kumai akefaenena kumaima he¹ya muki¹a kefo ya¹enema humainaya Sauve vaya¹mo¹yama ani kumate¹ma kae-malesageno ata halinamo¹ma agete¹ya tusiya hu¹ya hamauna hute¹ya avia ategahae. ¹⁰ Ani vea¹mo¹ya agatama aiya yama alia yafena tusi¹a koli hute¹ya alu¹ale heti¹ya maine¹ya mage hu¹ya hugahae 'Vaeha tahau hane tahau hane Papilonia ala kumala tokiya¹age kuma¹mogagi nagoke yagefi kaugafa kagata yana anonaka¹a ago alimainane.' hu¹ya hutegahae.

¹¹ Ma mopafima tusi¹a miyama alisaya ali¹ya ne¹aliya vea¹mo¹ya afeno ya¹amima miya hisaya vea¹nea omaige¹ya ani kumafena amakesa havi havi hu¹ya avia ne¹ate¹ya amaipamo¹a kana¹age hia yapi maigahae. ¹²⁻¹³ Ani afeno yama miya hisage¹ya monea alisia afeno yana kanileta yafateti

talo humale ya'ene efe yoleti talo humale ya'ene miyama'amo'a hai-mainea seveliya'ene sesuya-gaene haesa ohaesa kenaene ka'yoga'yo humainea kenaene oko kenaene muki'a kanale mana'age yosaene afumo avete talo humale ya'ene miyama'amo'a hai-mainea yosale talo humale ya'ene haesa yafateti talo humale ya'ene kapaleti talo humale ya'ene tokiya'age yafa'ene mana'age kimamufaene haga'age hige'ya nenaya yamo'ene mana'age halinama nehia ya'ene mana'age masave'ene vaini ti'ene atafi negayaya masave'ene ta'nefa falauva'ene vitimo alagaene pulamakaene sipi sipiene hosi afuene hosimo avayuma nehia kalene vea'mogami amaugafa muki'a miya hige'ya nofipi maine'ya miya o'ali ali'yama ne'aliya vea'nene, ali'ya vaiyatete nehaya afeno'ami miya hisaya vea'nea omaige'ya avia ne'ate'ya amaipamo'a kana'age humainae. ¹⁴ Humainage'ya ani ala kumafena mage hu'ya hugahae 'Muki'a tamaha'yema hige-tamama ne'aliya afeno'yana ago tamahafale'ya ha'no hutalae. Kanale miya afenotamiene konagali yatamiene ago ha'no hianagitama nago'ene o'aligahae.' hu'ya hugahae.

¹⁵ Hute'ya ani vea'mo'ya ani ala kumapiti'ma afeno'ya'amileti monema hu-hati'yama ne'aliya vea'mo'ya ani ala kumate'ma mainaya vea'mo'ya kefo yamo anona'amia amakatama aiya yana aliya yafe tusi'a koli hute'ya alu'ale het'i'ya maine'ya avia ne'ate'ya kalagila ne'ai'ya hamauna hugahae. ¹⁶ Nehu'ya mage hu'ya

hugahae 'Vaeha tusi'a tahu nehane tahu nehane. Nayona kanale kenaka'a haesa ohaesa kenaene oko kenaene fai-lineka konagalima ali-maleneka kanileta yafateti talo humale ya'ene kanale miyama'amo hai-mainea seveliya'ene kaugafale vai-lineka konagalia ali-maleka nemainane. ¹⁷ Nemainanagi nagoke yagefi muki'a ani ala mone afeno yaka'a muki'a ali haviya hugatae.' hu'ya hugahae.

Nehisage'ya 'Muki'a tipi kalefi kava vaya'ene tipi kalema ali'ya vai ne'ayaya vaya'mo'yaene ani tipi kalefima ali'ya ne'aliya yapiti miyama'a ali-mainaya vea'nene alu'ale heti-maina'ya Papi-loni kumala agegahae. ¹⁸ Ne'age'ya Papiloni kumala atamo'ma teno asagaligeno halinamo'ma muti muti hia yana ne'age'ya mage hu'ya hugahae 'Ani kumala muki'a kumala agase-mainea kumalageno teno ali haviya nehie.' hu'ya hugahae. ¹⁹ Nehu'ya ta'nefa kate'ya amanupi aite'ya avia ne'ate'ya hamauna nehu'ya mage hu'ya hugahae 'Vaeha ala kuma'mogae tusi'a lahou nehane.' Muki'a tipi kaleyagamona amafahe'ya anile visaya'amo'ya miya'amima ani kumate-gatila ala hu'ya ne'aliyanagi nagoke yagefi haviya-tafana hane.' hu'ya hugahae.

²⁰ Hugahayanagi tamakaya ikapinaga mainaya vea'mo-gatamaene Yisasina tamaku'a aminaya vea'mo-gatamaene Aposolo vaya'mo-gatamaene Anumaya Koti aune vea'mogatamaene ani kuma'ma ali haviya hutalea yafena muse hiho. Ani ala kuma'mo tamakaila ali haviya

hu nelamatea yafenagino Anumaya Koti'a kefo yama'amo anona'a ago amine hutama hiho." huno humaine.

²¹ Higeno nagola tokiya'age ensole kanomo'a nagola tusi'a yafakefa alisaga huteno hagelepi haga'yu hu ne'ataleno mage huno hie ani ala yafakefama haga'yu hutaloa yamo'a Anumaya Koti'a ani avamete huno ani Papilonia ala kumala, alino tusiya huno ali haviya huteno alino haga'yu hu-talenageno fanane hinage'ya nago'ene vea'mo'ya o'agegahae.

²² Yave'yamo'ma agema ne'aiya ya'ene alu'a alu'a yagamema nehaya ya'ene kapufama nehaya ya'ene ufema nehaya yamo'enena nago'enena agea aisige'ya ohavigahae. Vea'mo'ya kagaipina nago'ene ali'yana o'aligahae. Talo tala hu'ya imuma kiya kanafima kema yeso nehisaya kea nago'ene ohavigahae. ²³ Nayona kagai vea'mo'ya miyana hu hatisaya ali'yama ne'aliya vea'mo'ya ma mopafina ala vea'ne mainagetama tamakaya alu'a alu'a hanageke yama humatenaya yamo'a muki'a veala ayemavataga hu-mainayafe Anumaya Koti'a tamakai kumala ali haviya hu-taleneanagino tamakai kumatela ka'ni'mo'a nago'ene aivasa ohugahie. A'nema aligahe hageno a'mo'a vema aligahe hige'ya musema nehaya kemo'a tamakaipina nago'ene falote ohugahie.

²⁴ Anumaya Koti'a ageana ani kumate mainaya vea'mo'ya Anumaya Kotina amaku'a aminaya

vea'nene agai amaune vea'nenena ma mopafina kasago'ya vea'nenena hamae'ya falimatenaya kolamo'a ani kumapina hanea yafe auhanageke yama'amo'ene hanea yateti Anumaya Koti'a ali haviya hutegahie.

19

Ikapinaga mainaya vea'mo'ya Papiionima haviya hia yafene muse humainae.

¹⁻² Nagaya anile havugeno kasago'ya ikapinaga mainaya vea'mo'ya ala kegefafiti mage hu'ya hae “Tagaya Anumaya Koti agia alisaga hisune. Anumaya Koti'a kaiyekema humategahena kanale'ya huno kelamage keleti fatago huno kaiyekea hu ne'amateno ani kumai a'mona tokiya'ama hanegenomuki'a ma mopafi veafena ‘Kefo yama hiho.’ huno ali haviya hu ne'amatea yatetila Anumaya Koti'a ani kefo yamo anona'a ago amine. Ani kumai a'mo'a Anumaya Koti ali'ya veala hamaeno falimateneanagino ani yateti Anumaya Koti'a kefo yama'amo anona'a ago amine. Amineanagita Anumaya Koti agia alisaga hisune. Anumaya Kotitimo'a agai'age tokiya'age hale yamo aepa maineanagino tagu tamena ago aligati-maineanagita agia alisaga nehune.”

³ Ete'ya ala kegefaleti nago'ene mage hu'ya hae “Tagaya Anumaya Koti agia alisaga hisune. Ani kumala atama leno asagali-talia yapiti halinamo'a agola haige haige huno nehaiya yafe Anumaya Koti agia alisaga hisune.” hu'ya humainae. ⁴ Nehage'ya tueti fo'a (24)

kava vaya'mo'yaene fo'a (4) hamaimu'ene anaga'mo'yaenena ala sauve kanomo siale mainea Anumaya Kotite asaga hulavi'ya amako'ya yemaine'ya agia alisaga nehu'ya mage hae “Tamagelafa hu'ya nehayanagita Anumaya Koti agia alisaga hisune.” hu'ya humainae.
⁵ Nehageno ala sauve kanomo sialeti nago kemo'a falote huno mage hie “Tamakaya Anumaya Koti ali'ya ne'alitama aiyafinagama mainaya vea'mogatamaene afa vea'nene tamakima hanea vea'nenena Anumaya Koti agi alisaga hiho.” huno humaine.

Sipi sipi nafa'nemo'a a'ne alige'ya kave talo tala hu-malенаe.

⁶ Anile nago kea havuana kasago'ya vea'mo'ya alitalu hu'ya maine'ya ailalupe'ya haya kemo'a, timo'ma anama nelavino agema ne'aiya avamete nehu'ya, monagemo'ma nehia avamete hu'ya ala kegefafiti mage hu'ya hae “Anumaya Koti agia alisaga hisune. Anumaya Kotiti muki'a tokiya'a hanegeno kasago'ya kava vea'mogamina amakaseno agai'age ala kava kano maineanagita agia alisaga hisune. ⁷ Sipi sipi nafa'nemo'a* a'ma alisia kanamo'a ago falote higeno alisia a'mo'a ago talo tala huno maineafe tagaya tusi'a muse nehuta taipa kanale yapiti yagamea huta Anumaya Kotina tokiya'age hale yama'a hanea agia alisaga hisune. ⁸ Anumaya Koti'a oni'ya ohuno efe'age humainea kena ani a'mona amigeno fai-line.” hu'ya humainae. Ani kenahema hiana Yisasina amaku'ama

amitafa hute'ya alu aotage vea'nema fatago hu'ya nemaiya vea'mogami au'avafe humaine.

⁹ Anile ensole kanomo'a Yisasina amaku'a aminaya veafena mage huno nahapaiye “Kagaya mani kea avopi kao. ‘Sipi sipi nafa'nemo'a a'ma alisia imua ago kimalegeno ‘Eho' huno ke humalenagi'ya esaya vea'mo'ya tusi'a muse hisae.’ Mani kea Anumaya Koti kelamage kea hugeka nehavine.” huno humaine. ¹⁰ Hige'na nagaya ani ensole kanomo agia alisaga hugahe aiyafi asaga hulavi'na nago'ya yemaugeno “A'aogi kagaya na'a ohuo. Nagaya kagai'ene kafukagana'yaenena, Yisasi kema havitama atafa hulinetama huhaletama nehaya vea'mogatamaene nagoke ali'ya ne'aluna kano mainogi nagai nagia alisaga ohuganagi Anumaya Koti agi'age alisaga huo. Yisasi'ma humainea kemo'a Anumaya Koti kema huhale'ya hisaya tokiya vea'mogami amamine.” huno nahapai-mainaine.

Yoni'a ageana nago kanomo'a efe hosimo agupifi mainegeo agemaine.

¹¹ Ikamo'a aihagalo hige'na agogeno nagola efe'age hosimo'a mainege'na age-mainoe. Ani hosimo agupifima maiya kanomo agimo'a ma'a humaine “Efi efi huno kanale ali'ya ne'alia kanoe. Kelamage kege'ya nehia kanoe.” hu'ya agia aye-mainae. Ani kanomo'a fatago huno kaiyekea humateno nago'a vea'mo'yaenema tuma hisiana fatago yateti huno tua nehie. ¹² Aulagamo'a atamo ka'ni kana huno aiha nelegeno anutela ala Sauve vaya'mogami

tumano ku'yaga kasago'ya vai-linegeno augafalela nago agia kae-malegeno ani agia agai'age havilinea agi haneanagi'ya muki'a vea'mo'ya ani agia ohavinae. ¹³ Agai'ama fai-linea kolamo'a aya'aya kena'ale tusiya humainegeno Anumaya Koti aepama hugafino humainea yafe agima ayayana “Anumaya Kotina ke'ae.” hu'ya agia ayemainae. ¹⁴ Ikapinaga ati vaya'mo'ya efe hosiyagamo agupifi maite'ya kanale'ya huno efe'age huteno oni'ya ohu kena, faili faili hu'ya akavela umainae. ¹⁵ Ne'vageno muki'a ma mopafi vea'nema hamaesia ave'ne'ne humainea naepea avayafina aniline. Ani-linearagino amakaseno hagote Sauve kano maineno tokiya'age huno muki'a vea'mogamina kava humategahie. Humateneno vea'mo'ya nofi alagayaga amaiyaleti'ma aye lata-pageno tima'amo'ma nelavia avamete kava huno ani kanomo'a tusi'a tokiya'ama hanea Anumaya Koti'a haima vai ne'amatea kame vaya'a kefo yamo anona'amia amamigahie. ¹⁶ Ne'amamino kena'ale'ene aiya amote'lenema kae-malenea agimo'a ma'a humaine “Ala Sauve vaya'mogamina ala Sauve kano'amie. Ala kava vea'mogamina ala kava'ami mainea kanoe.” huno agia kae-malene.

¹⁷ Kae-malenege'na ne'lagogeno nago ensole kanomo'a yagemo aufi hetino muki'a ikamo amu'note hale'ya vai-yayea namayagahena mage huno hie “Tamakaya Anumaya Koti'a ala kave'ma taloma humalea kavetela melitalu hiho.

18 Melitalu hutama fali-mainaya Sauve vea'nene ati veate kava vea'nene mai-lokiya vai'ya nemaiya vea'nene hosi afuyagaene ani hosimo agupifi nemaiya vaya'ene, nofipi maine'ya miya o'ali ali'ya ne'aliya vea'nene afa'a mainaya vea'nene, ala amakiene vea'nene, osi amakima hanea vea'nene muki'a falisagetama amakaila amaugafamo amamela negahae." huno humaine.

19 Hige'na nagaya agoana ani kefo afai afuene ma mopafi Sauve vaya'ene ati vaya'amienena efe hosimo agupifima maiya kanoene ati vaya'aene tu hugahe melitalu humainae. 20 Na'a hayanagi anima efe hosimo agupifima maiya kanomo'a kefo afai afuene havigege'yama nehia aune kanoene alino nofi hunatene. Ani kefo afai afumo'a hapaigeno ani havigege'yama nehia aune kanomo'a tokiya'age avame yana humaine. Nehuno anima tokiya'age avame-name yama humainea yateti amaugafalela kefo afai afumo' agia kaemalenage'ya kefo afai afumona amema'amo agima alisaga nehaya vea'nena havige aye mavataga humaine. Anima aye mavatagama humainea kefo afai afuene havi aunema laga humainea kanoene hanaege'ana ofalina'agi afa'a hanaimula hanege'ya anavale'ya tusi'a komugefa hi'mana'age yafa'yagama hanegeni atama tegelege nehia komufi anasaga huno vai-talena. 21 Vai-taleteno efe hosimo agupifima maiya kanomo'a muki'ama melitalu humainaya

ati vaya'mogamina aya'aya naipea avayafina ani-lineanagino ani naipeleti hamaege'ya falimainae. Falige'ya muki'a namayagamo'ya ani vea'mogami amaugafa aye laga-fe'ya nageno tusiya huno amamupa-ropa ayemaine.

20

Satanina vani tauseni'a (1,000) kafu nofi huteno maine.

¹ Nagaya Yoni'na agogeno nago ensole kanoa ikapinagati elavi-maine. Ani kanomo ayapina ayola omale komule ki nofi'ene aya'aya seni nofi'ene hanegenon elavi-maine. ²⁻³ Elavia'amo ani osifa'vea metafahumaine. Ani osifa'vea ehe kanafima mainea osifa'vea kame kanotigino agia Satani'e. Ani Satanina metafahuno tokiya'age seni nofila kiteteno anima ayo'ma omale komufina asaga huno vai-taleteno avaya tileno tokiya'age hutegenon Satani'a vani tauseni'a (1,000) kafu ani komufina nofipi maineanagino ani kanafina vea'mogamina havigea aye mavataga ohugahianagino vani tauseni'a (1,000) kafuma ha'no hutesigeno'a ani komufitila atalesigeno aupa kana kano'afi ute ete hugahie.

⁴ Anile nagaya agoana nago'a veala ala sauve vaya'mogami siale mainagenon Anumaya Koti'a kaiyekema humate'ya ali fako humatesaya ali'yamo tokiya amamine. Ani vea'mo'ya Yisasina amaku'a amite'ya agai kene Anumaya Koti kene hamapai-mainaya yateti'ma amake'ya hataga hage'ya falimainaya

vea'mogami amamena age-mainoe. Ani amamema agoa vea'mo'ya kefo afai afuene talo hu-malenaya ame'ene agiene alisaga ohu'ya kefo afai afumo agienema hamanile'ene amayate'lenema omalene. Omalea vea'mo'ya ete'ya hamaimula alite'ya ala kava vea'ne maine'ya Kalaisi'ene vani tauseni'a (1,000) kafua kava yagai'ya maigahae. ⁵ Ani vea'nema heti-mainaya kana hagote-lamate'ya fali-mainaya veala hetisaya kana hane. Haneanagi nago'ama fali-mainaya vea'mo'ya ani kanafina heotigahagi vani tauseni'a (1,000) kafumo'a ha'no hu-tesige'ya hetigahae. ⁶ Anima hagote'ya hetisaya veala Anumaya Kotina alu aotage vea'ne'a mainayanagi'ya tusi muse hugahae. Anumaya Koti'a tegelege nehia atafina amatesige'ya nago'ene ete'ya tole molia kanalela ofaligahae. Ofaligahayanagi'ya Anumaya Kotigani Kalaisigani anakia alisaga nehu'ya ali'ya vea'ani maine'ya vani tauseni'a (1,000) kafua Kalaisi'ene sauve kava maigahae.

Satanina agola ali haviya hutene.

⁷ Haenaga'a vani tauseni'a (1,000) kafumo'a ha'noma nehigeno'a Satanina nofi'ma hutenea nopitila atalesigeno ehaigahie. ⁸ Hati-lavino visia'amo muki'a mopaene mopaene mainaya vea'mo-gami amakia Kogi nofi vea'nene Magogi nofi vea'nene Satani'a havige huno aye-mavataga hisia'amo “Melitalu hutama tu hiho.” huno amavaleno melitalu hu-matesige'ya ani

vea'mogami napamo'a ti kahaepa kana humaineanagi'ya huyo okigahae. ⁹ Ani vea'mo'ya muki'a kotega vai ne'aye'ya Anumaya Kotina amaku'a aminaya vea'mogami kumala, Anumaya Koti'a muse nehia ala kuma'mona meli kagi'ya amavayagigahayanagi ikapinagati atamo'a elavisia'amo ani vea'mogamina tesagali ha'no hugahie. ¹⁰ Ha'no hinageno Anumaya Koti'a Satanina, havigema aye mavataga humainea kanomona, ata neleno hi'mana'age nehia yafa'yagama tegelege nehia komufina asaga huno vaigahie. Ani komufina kefo afai afuene havigema nehia aune kanoene maina'a komufinagino ani lagufa (3) vayala anifinaga maine'ya kege'ene felugaene muki'a kanafina agola amagata aige aige hisia yamo'a hanetafa huno hanemategahie.

Anumaya Koti'a tusi'a kaiyeke humategahie.

¹¹ Anile nagaya Yoni'na himonafi kana yapi agoana ala efe'age ala Sauve kanomo sia hanegeno ani siale mainea kanoa age-mainoe. Agogeno mopamo'ene ika'mo'enena agai aulela fale'ana fanane hu'ana nago'ene omaletafa humaina'e. ¹² Nagaya fali-mainaya vea'ma agoana amaki hanea vea'nene, amakima omale vea'nene, ala Sauve kanomo aule hetimainageno ensole vaya'mo'ya avo'yaga ali vakaye-mainae. Nago avona, maige maige hisaya hamaimu'ma hanea vea'mogami amakima hanea avo'ene vakaye'ya ani avopina ago'ma

humainaya au'ava kava'amimo kema kae-malenaya keleti fali-mainaya veala Sauve kanomo siale maiya kanomo'a kaiyeke'amia fako humatene. ¹³ Hage lipima fali-mainaya veala ani limo'a amatalege'ya uva'yi hu'ya mo heti-mainage'ya fali yamo'ene fali-mainaya vea'mo'ya ne'vaya kotegaene anakaipima mainaya vea'mogamina amatala'age'ya ete'ya hetigeno Anumaya Koti'a humainaya au'ava yateti kaiyeke'amia fako humatene. ¹⁴⁻¹⁵ Kaiyekea humateteno muki'a vea'mogami amakimo'a maige maige hisaya hamaimu'ma hanea vea'mogami amaki hanea avopima amakima okaenesaya veala Anumaya Koti'a atama tegelege nehia komufi amavaleno haga'yu huma-talegahie. Fali ya'ene fali vea'mo'ya unemaiya ko'ene ata tegelege nehia komufi anasaga huno vai-talesige'ana ha'no hutafa huga'e. Ani atama nelea komufima visayana tole (2) yupa ete'ya faligahae.

21

Haegafa ika'ene mopaene falote hugahie.

¹ Nagaya Yoni'na agoana hagoteno'ma hanea ika'ene mopaene hage limo'ene fanane higeno haegafa ika'ene mopaene age-mainoe. ² Nagaya alu aotage kumala, haegafa Yelusalemu, Anumaya Koti'a ikapinagati ataleno elavige'na agoe. Agogeno a'mo'a vema aligahe kanale kenama fai-lineno kanale konagali ali-maleno vele'ma ne'via augafa kava huno elavige'na

age-mainoe. ³ Nagaya havugeno ala sauve kanomo sialeti nago ala kegefafiti mage huno hie “Menia Anumaya Koti'a vea'nene tokaeno maigahie. Ani vea'mogami amu'nopi mainesige'ya muki'a veala agai'a vea'ne maisageno Anumaya Koti'ami maigahie. ⁴ Maineno amaunua aye ha'mi-talesige'ya nago'ene veala ofaligahae. Amaipamo'a kana ohinage'ya avia o'ategahayanagino amakata aisaya yamo'enena ha'no hugahie. Nayoma nemaiya augafa au'ava yamo'a ani kanafina ha'no hugahie.” huno hu-maine.

⁵ Higeno ala Sauve kanomo siale'ma maiya kanomo'a mage huno hie “Haviho nagaya muki'a yana ago ali'na haegafa'age humaluanagino haegafa huno hanegahie. Mani kea tamage nehue. Muki'a vea'mo'ya havi'ya amakupi male'ya amametiti hisaya yafe mani kelamage ke nehugi kae-malo.” ⁶ Mage huno nahapaiye “Muki'a ali'yania hai alivaya aye-mainoe. Nagaya muki'a tokiyamona aepa'a mainoanagi'na kava yagai-maine'na muki'a yana ali vayayeso kano mainogi uhagote'na maite'na haenagalafa mainoe. Vea'mo'ya tifema amakesige'ya hamaimu alisaya tina kapai'ma nehagea tinagi'ya miya ohugahagi afa'a amamisuge'ya negahae. ⁷ Vea'mo'ya Satani'ene tuma hu'ya agasesayana nagaya mani kanale ya'yaga afa'a amamigahue. Amamite'na nagaya Anumaya'ami maisuge'ya amakaya nagai nafa'neyaga maigahae.

8 Maigahagi koli nehaya vea'nene, nagaifema havi'ya amakupima nomalaya vea'nene, amaku'amo oni'ya'age humai vea'nene, vea'ma hamae'ya falimate vea'nene, kumai he'ya vai ne'ayaya vea'nene, hanageke kava'ma nehaya vea'nene, ago fali-mainaya veafe 'Anumayati maine.' hu'ya amakisana ne'vaiya vea'nene, havige'age vea'nene hi'mana'age atama nelea yafa'yagamo'a atama tegelege nehia komufi hanea yate tavi'ya maigahae. Ani vea'mo'ya hagote'ya fali-mainayanagi'ya ani atama nelea komufima visayana tole (2) yupa ete'ya faligahae.”

Yoni'a haegafa Yelusalemua ikapinagati age-maine.

9 Anile seveni'a (7) yopafi, haenagalafama Anumayamona hai vai-mateno ali haviya humatesia yama'a hanea yopayagama atafa hu-linaya ensole veapiti nago kanomo'a nagaifena mage huno hie “Kagaya ege'na Sipi sipi nafa'nemo'a menima a'ma alitesia a'nea kavelino.” huno hie. 10 Hige'na Alu Aotage Avamu'mo'a tusiya huno natafa huteno navaleno nagola anayapi hai-mainea ago'yafi mo nateteno alu aotage kumala, Yelusalemua, Anumaya Kotitegati ikapinagati ataleno elavia kumala naveli-maine. 11 Navelige'na agoana Anumaya Kotina tokiya'age hale yama'amo'a ani kumatela aivasa humaine. Hale yama'amo'a tusiya huno alu'a augafa kava huno ala miyamo hai-mainea yafateti'ma aivasa nehia avamete kava humaine. Ani yafamo agia

yasipa taugosama ne'agona galasimo'ma ne-hia kava huno alave alave hige'na halege'na age-mainoe. ¹² Ne'agogeno ani ala kumatela kegi'ya anayapi hu-malageno hane. Ani kegi'ya kovefina tuelufu'a (12) fiana hane. Ani fi-amo amete ametela ensole veala heti'ya maite maite humainae. Ani fitatela tuelufu'a (12) Isaleli nofi vea'mogami amakia kae-malena. ¹³ Ani kegi'yafima hanea fiana yagama va'yi nehilega tagufa (3) fiane. Yagama tavi ne-falea kaiyaga tagufa (3) fia hane. Aluga aluga haopalega nago haopalega tagufa (3) fia hanegenonago haopalega tagufa (3) fia hanegenon humaine. ¹⁴ Ani kegi'ya ala kumate'ma aye-govema hu'ya kegi'yama humalayana hagote'ya tuelufu'a (12) yafana amalaguma aimale yatela maite'ya kegi'ya hu-malena. Ani yafatela Sipi sipi nafa'nemona tuelufu'a (12) aposolo vaya'mogami amakia kae-malena.

¹⁵ Nagai'enema kea kea hia ensole kanomo'a ani kuma'ene kegi'yaene fia'ene maleno agege gege huno hapaligahe kanileta yafateti talo humale ka'yona ali-line. ¹⁶ Ali-lino ea'amo me maleno ageana ani ala kumala aya'aya'amo'ene nago kaiyaga'amo'ene anayafima hai-mainea'amo'enena nagotineno nago avamete tueti tu hataleti (2,200) kilomita higeno muki'amo'a nago avamete humaine. ¹⁷ Higeno maleno ne'agea ka'yoteti ani kegi'yamona maleno ageana amegama hanemamo'a vea'mo'yama male'yama ne'agaya

augafa kava huno vani hataleti fotifo (144) mita humane.

¹⁸ Ani kumate kegi¹ya Anumaya Koti¹ma humaleana ala monemo hai-mainea yafana yasipae nehaya yafateti hu-malene. Hu-maleteno ani kumatela kanileta yafateti ki-malegeno aivasa huno alave alave hia yamo¹a galasimo¹ma hia kava humane. ¹⁹ Ani ala kumate¹ma amalagu aimale yate¹ma humaleana kegi¹yale malenaya yafana ala miyakefa hai-mainea yafateti malete malete huno humalene. Hagoteno¹ma malega¹mae-malenea yafamo agia yasipa. Anima tole molia yafana oko yafamo agia sapaiya malene. Anile tagufama (3) molia yafana nagola efe¹age yafamo agia agetie huno malene. Anile foa (4) molia yafana yosa haisa yafamo agia emelalie huno malene. ²⁰ Anile faefu (5) molia yafamo¹a efe¹ene haesa¹ene havigu humanea yafamo agia satonikisie huno malene. Anile sikisima (6) molia yafana haesa yafamo agia konilianie huno malene. Anile seveni (7) molia yafana kanileta yafamo agia kalisolaitie huno malene. Anile eiti (8) molia yafana yosa haisa yafamo agia pelie huno malene. Anile naeni (9) molia yafana nagola kanileta yafamo agia topasie huno malene. Anile teni (10) molia yafana yosa haisa kaliteno kaniletama¹a hanea yafamo agia kalisopelesie huno malene. Anile aleveni (11) molia yafana oko yafamo agia haiyasinie huno malene. Anile tuelufuma (12) molia yafana haesa yafamo agia ametisie huno malene. ²¹ Ani kuma¹mo kegi¹yale¹ma hanea fita tuelufu¹a (12)

fitmona miyama'amo'a hai-mainea seveliyateti talo humale fita hane. Nagoke nagoke fitalela nagoke ala seveliyateti talo humalene. Ani kumate'ma visaya katela kanileta yafateti talo humalenegeneno alave alave nehigeno akalo kate'ma he-nemalaya galasimo'ma hia kava hige'ya age hagalo hu'ya age-mainae.

²² Agogeno ani kumatela nagola mono nona omalege'na age-mainogi tusi'a tokiya'a hanea Anumaya Koti'ene Sipi sipi nafa'nene ani kumatela maina'age'ya muki'a vea'mo'ya anakai anakima alisaga haya yafenagino mono no kana hu'ana maina'age'na age-mainoe.

²³ Agogeno ani ala kumatela yagemo'ene ikamo'ene aivasa hisia ali'ya'ania omalegi Anumaya Kotina tokiya'age hale yama'amo ani kumatela tusiya huno aivasa hu-maigeno Sipi sipi nafa'nemo'a ani kumate ka'nila maine.

²⁴ Maina'ageno ani kumateti hale yamo aivasa hu-mainege'ya muki'a koteti vea'mo'ya vai ne'yesage'ya muki'a ma mopafi Sauve vaya'mo'ya kanale-nale ya'amia ali'ya ani kumate esa'ya'amo'ya emagahae.

²⁵ Mainesageno ani kumatela hanina okigahanagi'ya ani kegi'yamo fita ali'ya okigahae.

²⁶ Muki'a vea'mo'ya konagali ya'amienne ala amakiene ali'ya ani kumateke'ya egahae.

²⁷ Egahayanagi kefo yama'age'ma nehaya vea'nene, amaku'amo oni'ya'age humainea vea'nene, havige'age vea'nenena ani kumatela ometafa hu'ya omegahae. Omegahagi

Sipi sipi nafa'nemo avopima, maige maige hisaya hamaimu'ma hanea avopima amakima kae-malenesia anaga'mo'ya amakai'amige ani kumatela ehaigahae.

22

Yoni'a hamaimu amamisia ti'ene yosaene age-maine.

¹ Anile ani ensole kanomo'a nagola ala tikefa, hamaimu ne'amamia tina naveli-maine. Ani limona telelalayama'a omalegeno galasifima agehagalo nehia kava nehigeno ani limo'a Anumaya Koti'ene Sipi sipi nafa'nemogani maina'a sialeti ani limo'a elavi-maine. ² Elavia timo'a aiyayeno ala kuma'mo kamona amu'nopi nelavigeno ani timona aluga aluga agegayale hamaimu ne'amamia yosayaga hane. Ani yosayagamo'a nago kafumo agu'afina tuelufu'a (12) kanale ikama'ahe ikama'ahe ani alagamo'a afula nelean. Ani yosamo haisamo'a muki'a kotega vea'ma kali alisagenofena alino falu hu-matesia yosa haisa hane.

³ Nago'a Anumaya Koti'a hinageno ali haviya humatesia yana omalegahigi Anumaya Koti'ene Sipi sipi nafa'nene nemai'a sialatana ani kumatela hanesige'ya Anumaya Koti ali'ya vea'mo'ya agia alisaga nehu'ya maigahae. ⁴ Maine'ya Anumaya Koti aufina ne'agesageno agai'a agia hamanilela kaemategahie. ⁵ Ani kumatela nago'ene hanina okigahie. Anumaya Koti hale yamo'a aivasa humategahianagi'ya

nago'ene ka'nila hanagalisaya ya'ene
yagemo'enena aivasa ohugahie. Amaku
amamema agigati-mainea vea'mo'ya agola kava
yagai'ya maigahae.

Yisasi'a aupala huno egahie.

⁶ Ani ensole kanomo'a mage huno hie “Manima
nehavina kea kelamage kea hanegeka kagupi
malesana ke hane. Anumaya Koti'a amaune
vea'ne'ahena ‘Na'a hutama hamapaiho.’ huno
amaku amakesa ne'amamia kanomo'a ensole
kano'amona agai ali'ya vea'nele hutegen
ea'amo muki'a yamo'a aupama falote hisia
yana amave-lisiafene huno hutegen
umaine.”

⁷ Haviho. Yisasi'a mage huno humaine “Nagaya
aupana kanafi egahue.” huno hige'na nagaya
mage hue “Nago'a vea'mo'ya Anumaya Koti'a
haenaga falote hisia yafe mani avopima hu-
mainea kemo akave nemalesaya vea'mo'ya
tusi'a muse hugahae.”

⁸ Nagaya Yoni'na ani ya'yaga agete'na mani
kea ago havimainoe. Muki'a ani yana nave-
lige'na agete'na havimaine'na ensole kanomo
agia alisaga hugahe aiya'afi ape humainoe.

⁹ Huanagi ani ensole kanomo'a mage huno hie
“Kagaya na'a ohuo. Nagaya kagai'ene amaune
kafu-kagana'yaene muki'a mafima Anumaya
Koti avopima hanea kemo akave nemalaya
vea'nene ali'ya amafalu'na mainoanagika
nagai nagia alisaga ohuganagi nagoke Anumaya
Kotina agai'age agige'ya alisaga huo huno hie.”

¹⁰ Huteno mage huno hie “Manima Anumaya

Koti avopima hanea kemo'a aupa'a falote hisia yafe kagaya ani kea fala okio. ¹¹ Ani kanamo'a aupa'a falote hugahe nehiafe kefo yama nehisaya veala nago'ene ani kefo yana mai'ya hisae. Kumai yama nehisaya veala ani kava mai'ya hisae. Fatago kavake'yama nehisaya veala ani kavake'ya mai'ya hisae. Alu aotage au'ava yapima nemaisaya vea'mo'ya nago'ene ani kava nehu'ya maisae." huno humaine. ¹² Nehigeno Yisasi'a mage huno hie "Haviho nagaya aupa'a esuana muki'a vea'moya hu-mainesaya avamete amamisua anona'amia ali'na egahue. ¹³ Nagaya muki'a yamona aepa'a maite'na kava yagai-mainoanagi'na muki'a ali'yana ali'na avaya-yesua kano mainoe. Uhagote'na maitena haenaga-lafana mainoe. ¹⁴ Kasago'ya vea'mo'ya kefo ya'amihema havi'ya amaku'ama sese'ma humalenesaya vea'mo'ya musena hugahae. Amaku'a ago'ma sese hu-malenayafe hamaimu amamisia yosamo alaga ali'ya nene'ya ala kuma'mo fiatela afa'a hai falegahae. ¹⁵ Hai falegahayanagi kefo yama'age vea'nene, hanageke kava nehaya vea'nene, kumai he'ya vaine'ayaya vea'nene, vea hamae'ya faline'amataya vea'nene, ago fali-mainaya veafe 'Anumayati maine.' hu'ya amakisana ne'vaiya vea'nene havigehe muse hu'ya akave nemalaya vea'nene ani kuma'mona malaga maigahayanagi'ya Anumayamo ala kumatela hai'ya omaigahae. ¹⁶ Nagaya Yisasi'na ensole kano'nimona hutogeno tamakaitega

ea'amo nagai'fema havitama tamakupi malenaya vea'mo-gatamina mani kea hufalote huno tamahapaisie hu'na huteno. Nagai'nige Teviti nofipiti aginagomo'na maine'na Teviti nafa'ne'a mainoe. Nagaya hale yama'aene ka'nefila, natema hagoteno va'yi nehia ka'nefi mainoe.” huno humaine. ¹⁷ Higeno Alu Aotage Avamu'amo'ene Yisasina amaku'a amitafa humainaya vea'nene Yisasife mage hae “Kagaya eno.” hu'ya hage'ya mani kema havisaya veala Yisasife mage hu'ya hisae “Kagaya eno.” hu'ya hisae. Hisage'ya tifema amakesia vea'mo'ya etama Anumaya Koti'ma afa'a tamamisia timo'a maige maige hisaya tamahaimu tamamisia tinagi tamahaisigetama me neho.

*Mani avopima hanea kema havisaya
vea'mogatamina Yoni'a tokiya'age ke
tamahanepaiye.*

¹⁸ Nagaya manima Anumaya Koti kefima aune laga humale kema mani avopima hanea kema havisaya vea'mogatama mani kene alu kene moli lokaetama aya'aya kea ohiho. Tokiya'age ke tamahanepaugi na'ama hisayana Anumaya Koti'a mani avopima tamahanepaiya havi yama falote hulamatesia yamo'a tamakata aisia yanagino tamakaila tamamigahie. ¹⁹ Tamamigahigi nago'a vea'mo'ya manima Anumaya Koti avopima hanea aune kema ali talesayana Anumaya Koti'a mani avomo'ma tamahapaiya kanale yana otamamigahanagitama ani vea'mogatama

maige maige hisaya tamahaimu tamamisia
yosamo alaga nesaya yana tamaha-falesigetama
Anumaya Koti alu aotage kumatela o'ugahae.

²⁰ Yisasi'a mani kema tahapaiya kanomo'a
mage hie “Tamage nagaya aupa'a egahue.” huno
humaine. Hige'na nagaya Yoni'na mage hu'na
nehue “E, tamage Anumayati Yisasiga eno.”
hu'na nehue.

²¹ Anumayatimo'a Yisasi'a kayonema nehia
yama'amo'a muki'a amaku'ama amitafa nehaya
vea'mo-gatamina tamamisie. Mani kea tamage.
Ke'nia male ha'no hie.
Nagai'ni nagia Yoni'nae.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 21 Feb 2024 from source files dated 31 Aug 2023

55807fd5-1005-5405-89da-5533a7950c65